

四庫全書

史部

欽定四庫全書

浙江通志卷一百六十八

人物三

循吏二

湖州府

南北朝

沈憲 丘仲起

南齊書沈憲傳憲字彥璋武康人應辟為主簿歷餘杭令除駕部郎補烏

程令武陵王為會稽以憲為左軍司馬太祖以山陰戶衆難治欲分為兩縣世祖啓曰縣豈不可治

但用不得其人耳乃以憲帶山陰令政績大著遷
冠軍長史廣陵太守以疾去官卒當世稱為良吏
憲同郡邱仲起先是為晉平郡清廉自立褚淵嘆
曰見可欲心能不亂此楊公所以遺子孫也仲起
字子震宋元徽中為太
子領軍長史官至廷尉

丘仲孚

梁書本傳字公信烏程人選國子生補主簿
歷揚州從事太學博士于湖令有能名遷山

陰令長於掇煩善適權變吏民敬服號稱神明治
為天下第一徵為尚書右丞遷左丞仍擢為衛尉
卿恩任甚厚俄遷豫章內史在郡
更勵清節卒贈給事黃門侍郎

沈瑀

梁書本傳字伯瑜武康人起家州從事奉朝請
竟陵王子良引為府參軍領揚州部轉從事甚

相知賞子良薨復事刺史始安王遙光嘗被使上
民丁速而無怨乃令專知州獄事湖熟縣方山埭

高峻冬月公私仁侶以為艱難瑀乃開四洪斷行
客就作三日立辨明帝復使瑀築赤山塘費減材
官所量數十萬永泰元年為建德令教民種桑柿
梨栗頃之成林高祖即位陳伯之表瑀催督運轉
軍國獲濟遷駕部郎母憂去起為餘姚令縣大姓
虞氏千餘家請謁如市前後令長莫能絕自瑀到
有至者悉立之堦下以法繩之自是權右屏
跡徵為少府卿出為潯陽太守為盜所殺

宋

陳舜俞

宋史本傳字令舉吳興烏程人舉進士又舉
制科第一熙寧三年以屯田員外郎知山陰

縣詔俟代還賜館職舜俞辭曰爵祿名器砥礪多
士宜示以至神鳥可要期如付劑契繳中書帖上
之青苗法行舜俞不奉令上疏自劾曰官制放錢
取息雖分為夏秋二科而秋放之月與夏斂之期

等夏放之月與秋斂之期等不過展轉計息以給
為納使民終身以及世世每歲兩輸息錢無有窮
已是別為一賦以散海內非王道之舉也奏上謫
監南康軍鹽酒稅五年而卒舜俞始嘗棄官歸居
秀之白牛村自號白牛居士已而復出
遂貶死蘇軾稱學術才能兼古人之器

盧革

宋史本傳字仲辛德清人慶歷中知龔州蠻人

使杜杞請治諸郡城及易長吏之不才者又言嶺
外小郡合四五不當中州一大縣無城池甲兵之
備將為賊困宜度遠近併省之後儂智高來九郡
相繼不守皆如革慮知發泉二州復為宣州以光

致祿卿
仕

朱服

宋史本傳字行中烏程人熙寧進士甲科元豐
中擢監察御史裏行參知政事章惇遣袁默周

之道見服道薦引意以市恩服舉劾之惇補郡免
默之道官紹聖初拜禮部侍郎後知廬州廬人饑
服便宜賑護全活十餘萬口明年大疫課醫持善
藥分拯之坐與蘇軾遊貶海州團練副使蘄州安
置改興
國軍卒

陶旄

汪藻陶旄阡表字季成吳興人元符三年進士
調陝州司理參軍童貫用兵請旄從固辭貫亦

不能強也知鄭之管城嫠之東陽杭之富陽低徊
數邑幾二十年在東陽時俗喜鬪家藏鎧仗更數
令不能禁旄痛
懲之風俗為變

朱南强

嘉靖安吉州志字柔立主晉陵簿有倚當塗
勢奪民田者南强按歸之移宰上虞地瀕海

民業煮鹽多致訟乃為析利害
上提舉請置場交易民甚便之

沈瑄

嘉靖湖州府志字次律德清人宣和間任兩浙漕運王師收方臘瑄規畫應辦民以不擾後奉

使至燕雲金人入寇郭藥師敗降瑄為藥師所執遣同李鄴赴闕議和瑄首陳虛實乞召兵會河北

邀擊不聽乃著南歸錄以據忠憤自號柯田山人終老焉

莫漳

弘治湖州府志歸安人登進士第淳熙初知仁和县縣時有出入德壽宮者恃勢虐民漳於宮門

外候其出擒而撻之高后怒孝宗降漳一秩居數月平江缺守宰執進擬孝宗曰朕有其人遂除漳

院轄以承議郎知平江

沈介

西江志湖州人乾道四年守信州與趙師嚴為代師嚴在任時州兵嘗欲援往例有所求不獲

遂謀亂雖散府庫以撫之猶反側未安介至誅首領二人餘皆安堵歲饑賑貸有方民得不死去官

之日老稚扶攜隨行
數十里涕泣不忍舍

章謙亨

西江志湖州人紹定間知鉛山為政寬平人號生佛家置像而祀其興學養士禦盜安民

禮賢表俗蠲賦救荒事績
邑人勒之章巖以志不忘

施宿

兩浙名賢錄字武子長興人慶元初知餘姚縣為政務大體興廢舉墜不事細謹姚北瀕海歲

役民修堤民甚苦之宿更築石堤建莊田二千畝以備修堤之役功與前令謝景初同稱

李元吉

福建道志湖州人淳祐間知福清縣始視事訟日三百餘牒未期月幾無訟云

元

程卹

黃潛程卹墓誌字晉輔曾祖公許自蜀居湖州卹於書無不讀用薦署嘉興路儒學錄歷江山

縣尹再遷武岡路綏能縣尹縣鄰谿峒民夷獠處
竊發不時卹拊循愷悌境內以安會廣冠猖獗長
貳而下以供億軍需出境卹獨任縣事師旅經從
枝梧遣發戒令嚴明士卒帖帖不敢肆行縣有義
倉糧二萬餘石積為豪強所侵悉徵理之歲適大
侵賴全活者甚衆轉慈谿縣令慈谿密邇帥閫事
尤叢劇卹設施注措若不經意咸盡其宜縣東花
嶼蓀湖受諸水溉田可六十頃豪民或請堙湖為
田而輸糧於官吏以成案請署卹毅然不可事遂
寢湖旁農家均獲其利年七十以奉訓大夫婺源
致仕知州

倪淵

黃潛倪淵墓誌字仲深烏程人精敏絕人用薦
署本郡儒學錄授太平路當塗縣主簿時長官

皆以故免去淵獨理縣事延祐初經理田土考覈
多失其實賦斂不均公私咸以為患淵分畫編次

以為圖籍出其隱匿而去其增加二稅乃如期而
集歲適大侵民以狀言災傷郡戒縣勿受溺爭之
不得即解印求去郡遣吏謝且以檢視之事悉諉
之淵躬履阡陌不避其勤民賴以甦以年老致仕
唐棣兩浙名賢錄字子華先世錢塘徙吳興以薦除
休寧縣尹先是豪民好為兼併貧民至空產賦
往往逋亡棣釐其弊具為科條擇任廉吏宿弊一
清流逋歸復山民老人擁馬抃謝其為政惟用儒
法剛柔適調歸於太和居五年政平化行獄訟
止息課為江東最以老去官民涕泣塑像祀之

明

王瑄

嘉靖湖州府志字廷璧長興人永樂甲申進士
任兵部主事陞刑部郎中會囚越獄有數十重

囚不去訊之則曰王郎中必不枉我故諸司官咸
坐罪而瑄獨免又理刑直隸值歲侵賑卹流亡修

復崑山常熟水利民甚德之累官按察使乞歸

方琛

弘治湖州府志字廷獻歸安人永樂乙酉舉人知崇仁縣邑無恒產惟以折色貿易准辦稅賦

率多逋負琛奏請從民便賦之邑民賴焉歲旱禱於華山即得雨後陞山東布政司經歷卒之日家

無餘貲

陸嵩

嘉靖湖州府志字如嵩歸安人弘治丙辰進士授羅源知縣以才賢改知南平政績大著歲大

旱與郡守孫衍詣龍潭齋宿祈雨未幾雨大澍冒行數里遂感寒疾卒民為立哀慕祠於城中

王濟

湖州府志字汝舟烏程人成化辛丑進士授南兵部主事所轄馬快船二千餘艘中官怙勢侵

沒無算濟力為裁省大司馬王恕深器重之以忤銓司出知雲南臨安府地多奇貨又夷民雜居多

盜濟遏其亂源盜用以息
陞貴州副使引疾致仕

張壘

江西通志字元器歸安人成化進士知上高縣興學校均賦役節浮費弭盜賊時新昌降賊譚

尚武者假巡捕之名擾害鄉民壘密疏除之地方以寧累陞福建副使

韋商臣

獻徵錄字希尹長興人嘉靖癸未進士授大理右評事會言事諸臣多繫詔獄下大理讞

奏商臣上疏抗言忤旨謫靖江丞量移德安府推官應山有巨姓被誣大辟者憲使張鯤閔其枉而寬之巡撫與張有夙憾駁令覆訊商臣據法論報又有龔友昌者亦被誣久繫商臣一訊得其情竟從末減郡稱為神明陞河南按察僉事永寧巨寇董氏嘯聚為亂率兵討平之其他搜剔吏弊搏擊豪強平反冤獄撫處流民諸政皆鑿鑿可紀撫按交章論薦而臨潁有杜黃門者仇殺三人杜之兄

時為通政參議數致書弗聽立捕治之復有豪民播教窟羣盜驗實論死詞連鄉宦黃彬以故諸權貴銜之騰蜚語於朝竟以考察論罷

陸時雍

西江志字幼淳歸安人嘉靖進士授上高縣精勤吏事嘗建便民倉又纂水利志以便一

方農事累遷江
西提學副使

臧繼芳

長興縣志號堯山嘉靖癸丑進士歷官水部郎中督理高郵河道值景王之國欲毀濱河

民居伐堤柳以便舟行繼芳曰政在利民病民以便上非義也國之大計在漕植柳以護漕堤伐之非策也乃屬徒役為木道扼舟而前擢守松江歲大水奏蠲其賦煮粥給粟躬賑貸之歷晉河南按察副使

胡友信

獻徵錄字成之德清人隆慶戊辰進士授順德知縣縣歲賦率奸胥攬輸稍以所入啗長

吏謂之月錢友信與民約歲為三限多寡皆自輸不取贏於是閭里無妄費而公賦以充海寇竊發部內烏洲大洲賊所巢穴友信悉勾得之以勁卒搗其巢誅渠魁餘黨解散又鄉立四應社一鄉有警三鄉鼓而援之不援者罪同賊賊不敢發初友信慮民輕法泄以嚴既令行禁止更為寬大或旬日不答一人其治縣如家弊修墜舉學校城池咸為更新督課邑子弟教化興起卒官士民立祠祀之德清縣志友信讀書天一山中蒐覽古集研究理宗為文必嘔心涸膽成進士銜命封魯藩謝饋遺弗受除順德令自言曰誓不帶牙簪出梅嶺題其署曰順動而天地如斷行而鬼神避邑無城建議興築公私不擾濬隍得石碣有胡成城三字洫任三載有甘露岐來之瑞卒於官含殮不具所著

有天一山房
稿世傳誦之

韓紹

湖州府志字光祖烏程人隆慶辛未進士令寧德詒百年陷海之虛糧令長樂縛十年不獲之

大盜拜給事中以忤江陵外轉歇歷藩臬備兵府
江地多箐棘強盜竊伏烟瘴鬱蒸路絕行旅紹移
檄募商伐山開徑五十餘里
遂成孔道遷太僕寺卿致仕

沈如霖

廣東通志歸安人萬厯間為普寧令縣設幾
四十年草萊猶未盡闢霖至清賦役保善良

日進諸生而教之稅使擾
民調劑得宜民受其惠

沈子來

歸安縣志字汝修萬厯庚辰進士令句容值
丈量有司競以加額增賦為考最子來獨辦

其高下增減之調廣平捕土豪致之死合邑稱快
陞刑部主事歷員外郎中出知梧州府改寶慶時

征播之軍所過剽掠子來預以糗糧陳境上牒總
戎令約束將士民乃晏然陞湖廣副使調貴州都
勻苗帥展打倡亂諸郡驛驛子來廉知土同知蒙
詔雄勇可用推誠待之授以方畧三出破賊巢前
後斬首四百級擒展打誅之積寇得平卒於
官不能治喪吏民斂錢為行裝子文衛却之

臧懋中

長興縣志字用甫萬歷戊戌進士授鹽城令
會有旨浚沁河鹽邑千里奔命懋中謂罷民

非策簡閭右有幹力者十許人攜帑金詣徐募土
著又先散金易糶輦而至工所役者得食麕至終
役無逃者時兩淮夫役繁興鹽居其間不知有徵
調之苦歷廣西按察副使署八桂兵事以屯堡代
驛遞軍不濫役而民力以蘇比入覲
卒於京二子晃如照如皆成進士

王永寧

江西通志烏程人萬歷進士授臨川令行履
畝法墾田定賦吏不得夤緣為奸修城興學

皆有實政

賈宗悌

河南通志武康人萬厯中知永寧縣明習吏事開興福渠以溉民田至今賴之

唐世涵

福建通志烏程人崇禎八年守汀州以城垣畧薄設法增築創寶珠門甕城移慈濟閣為

戎樓又捐俸造萬安濟川二橋以利涉民立祠祀之

沈戩穀

德清縣志號器車崇禎丁丑進士知棗強縣時歲祲斗穀溢千錢戩穀捐俸設糜所全活

以萬計善察冤獄多所平反後陞守廬州以病歸

國朝

談九乾

德清縣志字震方康熙丙辰進士授沙河知縣縣居南北衝要且地為沙壓土甚瘠九乾

洞悉民艱凡陋規加派詳革殆盡褫學霸姪淫僧
安巨室植柳以總人行浚井以便人汲陞禮部主
事改吏部陞員外郎掌銓政隨征厄
魯特議敘復監理河工著有勞績

戴振河

德清縣志字衣聞康熙戊辰進士授永寧知
縣入署見里民供辦甚具驚問得實悉却之

常平倉積穀二萬貴糶賤糶官餘民病振河春貸
秋償不責其耗羨闢險嶺為蕩平路行者便之丁
艱服闋補松滋邑有堤工歲賦民折土銀五千餘
兩歲修歲圯振河廉得其實直賦民土而督修之
匝月工竣永無歲修之擾民名其堤為戴公堤額
徵正課外舊有雜派四千兩振河以無藝革之行
取任部曹出守邵武府興利除
弊三年不遣一役下鄉卒於官

胡開京

德清縣志字遵王會恩子授池州府通判攝
宿松縣事革漕弊抑豪強有民被殺而不得

主名往驗察其妻與旁觀一人狀異得姦殺情寘之法攝燕湖篆值大水報災請賑設廠拯救無算又攝建德除虎患緝盜安民及署府事代償前守兵餉却屬邑餽贖丁艱歸服闋補順德府判職司捕盜以盜源在窩線必嚴保甲而後根株可拔為畫八條上之通行畿輔著為令擢永平知府卒於官

寧波府

宋

周師厚

延祐四明志字敦夫鄞人皇祐五年進士仕至荆湖南路轉運判官時役法方行師厚言

四方風俗不同役有勞逸輕重不宜以一槩論朝議是之章惇聞溪洞蠻擾辰沅二州議輸常平粟

以備邊師厚持不可曰溪獠靜擾無常常平歲入有程當使邊卒廣屯田為便帝從其議

袁穀

建安歷四明郡志字容直鄞人嘉祐六年進士尉

以薦知邵武軍條鹽法利病奏減其課郡人祠之

俞偉

延祐四明志字仲寬鄞人熙寧六年進士宰南劍之順昌閩人生子多者皆不舉建劍尤甚偉

作戒殺子文召父老列坐廡下以俸置醪醴親酌之使歸勸鄉人活者以千計生子多以俞為字部使者聞於朝降詔獎諭進秩再任

姚孳

寶慶四明志字舜徒慈谿人熙寧九年進士為桃源宰部使者舉其才能優異應元符之詔賜

對稱旨除提舉成都府路常平等事謁丞相論蜀中利病乞以義倉之儲收養鰥寡老疾死給衣衾

斂瘞貧不能舉子者官給乳媪丞相奏行後由江東轉運副使除直龍圖閣知夔州興學校勸農桑

有古循吏風

陳攄

寶慶四明志字君益鄞人紹聖間宰南劍之將樂敦崇學校獎進士類先是邑民家舉一子富

室不過二子餘悉棄之攄諭以天性中以令甲犯者究治自茲民無不舉子者後卒於官邑人祠之

汪思溫

延祐四明志字汝直鄞人政和二年進士授雄州教授調餘姚今築堤浚湖民信愛之後

知臨安時相秦檜嘗以故人屬薦舉思溫曰使可薦誠不待相諭不才相言無益也有旨營政府檜欲

以相府儀制稍異執政府思溫益持不可檜怒因罷去予祠

薛朋龜

兩浙名賢錄字彥益鄞人政和八年進士授仙居縣尉值歲饑道殍相望剽掠四起朋龜

請發粟賑之民多全活而弭盜有法境內悉平改
楚州司錄適靖康之變楚師勤王者歸道州境郡
守薄其犒輒鼓譟為亂朋龜急走軍中諭以禮法
隨發府金犒之軍帖服不敢譁任滿擢奉議郎去
民遮道留之卧轍不得行監司上其狀擢監行在
登聞鼓院兼擢工部郎中守正不阿彈劾權貴後
知衡州
致仕

劉侯

寶慶四明志字碩翁象山人紹興三十年進士
知華亭縣平易近民而決事若神豪猾斂手並

海有泰山鹽鐵蚌港三堰不治被旨督作早夜露
處護田六萬畝孝宗深加褒賞倅紹興府帥王希
呂使者朱熹雅敬之委理諸暨蕭山荒政知興國
軍陸辭乞免蕭山廢田之稅以時省繕華亭海堰
禁邏兵胥吏擾沿海民船事皆施行改知岳州覈
四邑常賦外免其板帳鑿空如馬草錢之類其目

凡八歲減額一萬一千有奇奏定為令除監廣東倉時南海驛道至真陽達凌江多窮荒複嶺乃改闢大道八百里置六鋪建七菴募人居之遷福建憲副召除吏部郎中卒

楊王休

延祐四明志字子美象山乾道二年進士為黃巖尉邑有豪民植奸黨號三神王休捕

得之具罪狀黥徙他鄉郡縣稱為鐵面少府後除益利路轉運判官兼提點刑獄大修棧閣鑿鬼愁灘堰募頤山分西城漢陰平利三邑馬綱以便民築漢嘉西門石梁蜀民德之

王時敘

王時會

嘉靖寧波府志時敘字伯倫奉化人乾道五年進士歷知遂安縣陸

游為郡日縣上所斷大族爭訟僚屬咸會陸以遂安狀銜袖曰得一好文字為諸公出之且讀且喜曰使諸邑皆如遂安吾輩可以卧治及卒陸誄之曰學道愛人正心誠意惻惻無華儒雅飾吏子之

自著古人何媿弟時會字季嘉與兄同年第進士
自迪功郎七遷至湖南運管所至有聲嘗知會稽
值歲霖潦郡方督已蠲之賦甚急時會持不可守
不聽乃袖告身易服立庭中守為奪氣民賴以紓
修社倉之政以備凶歉立保伍之法以察不孝不弟游惰不逞者

徐子寅

成化四明郡志字協恭鄞人少以任補官中
法科為福建路檢法審覆囚牘駁正死罪七

十九人除大理正累遷淮南運副歷揚州楚州修
築高郵興化寶應縣石閘斗門函管堤岸護民田
三千七百餘頃後知台州革秋苗偽鈔去軍士虛
籍寧海邑庠久廢買田五百畝繕之蠲民戶積逋
十餘萬陞廣東
提刑卒於官

羅仲舒

成化四明郡志字宗之慈溪人淳熙十四年
進士授安慶教授累遷提點江東刑獄點吏

獻議於饒守更鬻鹽法而官專其利舟運不通民數月乏鹽仲舒責吏曰奪民而絕其利者汝罪也咎而流之饒人為之語曰前葛後羅一臺二妙葛謂參知政事邲也召為國子司業紹定初以直顯謨閣致仕

史彌忠

咸化四明郡志字良叔鄞人舉進士為鄂州咸寧尉歷宰廬陵有能名守南安會盜甫平

政尚安輯蠲白撰錢以便民守吉州治如南安蠲田租十有八萬尋致仕後以子嵩之為丞相積封至金紫光祿大夫卒贈少師諡文靖

林祖洽

咸化四明郡志字元禮鄞人少以門功補官知鹽官縣滯訟經歲者皆剖決之光宗以皇

太子尹臨安委治疑獄有能名後守饒信史治益著歷遷司農少卿

桂萬榮

成化四明郡志字夢協慈溪人慶元二年進士授餘干尉邑多豪右一裁以剛介而御小

民以慈愛秩滿調建康司理尋通判平江時守朱在政尚嚴刻因鹽課拘繫甚衆萬榮具書告在不從乃挾行牒與所拘人同寢在愧即委縱遣焉陞守南康檢吏奸省浮費征稅以法進直秘閣遷尚書右丞

奉祠

徐愿

成化四明郡志字恭先昌國人開禧元年進士除福建提舉適黃勇寇發衆皆退避愿為婉言

撫諭寇列拜請罪愿嘗受業袁變故其政事文學卓絕於時

劉厚南

成化四明郡志字子固慈溪人嘉定元年進士授迪功郎調瑞安尉瀕海多盜厚南蒞政

慈惠盜遂屏息民賴以安楊簡出守溫州舉其勤於奉職累階進秩皆有能聲

程士龍

嘉靖寧波府志字應辰慈溪人嘉定四年進士主句容簿時歲饑督濟有方老弱賴以全

活真德秀重其才薦知仙居李宗勉復薦之遷知臨江軍後改知撫州城中有夜半殺人者逮繫至六七囚獄成士龍疑之俾臨川宰密察得其應辟者捕之一訊而服民作平冤歌頌其神明

童居易

天啟慈谿縣志字行簡嘉定己未進士補登仕郎時朝廷欲使諸路置買浮鹽司除擬已

定居易詣執政歷陳利害命遂寢攝天長簿時諸路多屯兵每歲棗熟制闔下令禁民採取民失其利居易上書乞弛其禁制闔從之旁九縣皆賴免尋調諸暨簿境有惡少攻剽為奸尉莫能致居易以計悉擒之民謡曰童主簿威如虎愛百姓擒跋扈轉宣義郎知邵武之泰寧厯遷太學博士率以身教以言會子事忤上意出倅吉州陞知廣東德慶府夷獠雜居民悍難化居易撫以宣弟之政三

載民樂耕桑門不
夜闔尋上章乞歸

王撓

兩浙名賢錄字謙父鄞人嘉定進士授安吉丞攝令長興捐俸賑水災民賴以不饑再攝新城

斥餘財五萬緡代貧民賦遷將作監主簿時史嵩之專政乞補外通判婺州御史劉晉之誣衢州掾慮囚受賕撓審實卒白焉後守徽州始至郡廩無三月之儲及解去粟支一年帛萬匹遷吏部兼崇政殿說書嘗預修四朝史

楊珏

成化四明郡志字君寶鄞人紹定二年進士授通直郎知饒州德興縣邑居四山之僻民多艱

食珏乃節用積錢一百萬置米千斛貯之顯惠倉歉時出之以平市價景定間轉朝奉大夫入對條陳三策一曰任正人而黜奸邪二曰興民利以培治本三曰講武事以圖恢復上悅及郡縣行方田

珏曰政以利民不利而行如吾民何遂却不行御史朱獬劾之免官歸

黃仁儉

兩浙名賢錄字約之奉化人主淳安簿俗獷悍歲時競渡多殺傷尉懼而在告仁儉攝事

處之帖然轉監台州支鹽倉攝郡幕給軍衣有紕薄者羣卒攘臂以噪座上皆失措仁儉徐呼其長諭以禍福羅拜曰黃佛子言敢不聽遷青田丞時永嘉遣海船籍篙師為兵乞取家屬小人乘勢指檄使覈實得免人咸德之

趙汝笈

江西通志字景師四明人慶元進士嘉定間知上高縣待士以謙斷獄以恕諸司疏其治

狀為諸邑最先是上高諸鄉額有坊場許人買換名曰教練每一名四季認白納錢少者不下百千民被其擾汝笈力請朝省罷之

元

臧夢解

元史本傳慶元人宋末進士未官而國亡至元間授知海寧州時淮東按察副使王慶之

按行至其州見夢解剛直廉慎官署肅然凡有差役皆當其貧富吏無所預民以戶計者新增七百六十有四田以頃計者新闢四百四十有三桑柘榆柳交蔭境內政平訟簡為諸州縣最乃舉夢解才德兼備宜擢清要而御史臺亦以其廉能薦屬江陰飢江浙行省委夢解賑之夢解不為文具皆躬至其地人給以米所活四萬五千餘人擢廣西肅政廉訪副使故事烟瘴之地行部者多不躬至夢解咸徧歷按問賓州藤州兩路達嚕噶齊與凡貪官奸吏置於法者八十餘人又平反邕州黃震被誣賊罪及藤州唐氏婦被誣殺夫罪大德元年遷江西肅政廉訪副使有臨江路總管李倜素附

大臣勢以控持省憲夢解按其贓罪一道澄
清後以亞中大夫湖南宣慰副使致仕卒

葉恒

成化四明郡志字敬常鄞人泰定初擢第授餘
姚州判官鋤奸抑强百廢興舉州東北際海歲

被風濤害稼嘗以竹石作土堤以捍率不能久恒
乃設方略甃以石長亘二十里民不知勞隄南舊
有二湖廢為廣斥者幾四十年因堤成而湖復渚
水時其啟閉田獲灌漑海潮之患遂絕後遷淮安
路鹽城尹民多不律恒執法其尤橫者
臺察交薦將大用而卒民立祠祀之

范文中

成化四明郡志字煥章定海人大德十一年
民飢盜起文中手縛巨魁十數人歸於有司

除黨竄伏中書奏授慈谿鳴鶴巡檢陞歙縣主簿
尋調廬陵習俗諱健素號難治民蕭甲與子殺人
以誣怨家劉乙文中覈實遂寘甲於法而籍其家
豪右驚服擢知沙縣造義倉以備凶荒崇儒學以

興禮讓年七
十投牒歸

明

汪繒世

成化四明郡志字漢文鄞人宋尚書大猷五世孫洪武初授太平府同知推誠馭下吏民

不忍欺事恒先期而集秩滿陞湖廣按察副使振肅憲紀奸欺多所撻發然以寬濟明未嘗吹求人罪論者謂憲職在正已以率物繒世有焉

陳奐

成化四明郡志字聚奎慈溪人洪武中用薦召至闕廷試稱旨授扶溝令修舉廢墜除革奸蠹

尋調山西之屯留土壤硤瘠民多流竄奐為出公帑錢輸其逋租流民相率來歸以憂去服闋改都督府都事成祖念京縣政煩特授上元令涖政期月縣以大治歷遷刑部主事仁宗監國時即知奐

欽定四庫全書

浙江通志

十六

賢即位與奏事仁宗曰此非上元陳知縣乎
左右曰然即擢為滕府長史進階奉議大夫

周弘

兩浙名賢錄字尚德慈溪人洪武中以薦授柘
城令在縣九載寬厚廉謹愛民如子戢暴橫節

用度一
邑大治

張海

天啓慈谿縣志字子深洪武中以貢至京師召
對稱旨擢戶部主事歷陞山東右叅政時太宗

初御北京呂梁至臨清實朝貢要途水道阨塞舟
行不利乃命平江伯陳懋興海並事穿渠甃閘事
竣復慮暴水衝齧新岸善崩請給馬連草
子五百斛種之沿涯以固土力堤岸遂固

應履平

嘉靖寧波府志字錫祥奉化人洪武庚辰進
士授泉州德化令興廢舉墜平易民遷守

常德吏治益著陞貴州按察使奉勅同兵部尚書
王驥平蠻將軍蔣福帥師征麓川有功陞雲南左

布政時有太監奉命監造剔漆器皿進用供費百
出民不能堪履平諗其將訖工別造私物密疏欽
造數完奉旨起送部檄至履平懷之中道馳入太
監怒叱之對曰奉旨請回京出文以示太監去一
方以
寧

吳福

兩浙名賢錄字好德鄞人洪武庚辰進士授禮
科給事中歷陞陝西參政先是寧夏鹽池禁嚴

斗米易鹽三兩福奏許民納課官量給鹽民咸便
漢中牛山逋民草竊出沒福遣吏作樵夫懷榜抵
其巢穴諭以禍福其黨語曰吳公長者必不欺我
相率復業者數千人秩滿陞福建右布政治行益
著以年
老乞歸

張得中

兩浙名賢錄字大本鄞人永樂甲申進士授
刑部主事改江寧令機務繁劇前令率繩之

以法得中更以公恕簿書期會米鹽細故必躬親之每丁夜而起丙夜而息未嘗樹赫赫之聲而民安其政以疾卒

蔡胄

兩浙名賢錄字用嚴鄞人永樂乙酉舉人以薦授宜春令改餘干愛民如子有干憲度者必諭

使自新未嘗輕有笞詈清修苦節薦餽雖蔬蕲不納室中琴一張書數帙而已不諧於郡守吏部尚書郭璉巡撫江西郡言胄徵科無法考下當去縣民相率走百里外聲胄冤言數十年未有公廉愛民如蔡者奈何斥之泣訴車下郭嘆曰吾行縣多矣未有一民頌其令者郡言詐也更考胄最而以貪黜其郡守

王瑩

嘉靖寧波府志字宗器鄞人永樂戊子舉人授淮安府睢寧教諭擢禮科給事中改刑科宣德

初勅守聲慶下車蠲宿弊務更新未幾化行境內
帖然秩滿增秩正三品改知西安治如聲慶而稍
濟以嚴越
三年致仕

陳本深

嘉靖寧波府志字有源鄞人永樂戊子舉人
擢刑部主事畿內有韓廣者為盜殺人逃匿

有司捕之波及無辜十八人本深物色得之十八
人者俱得免進員外郎宣德庚戌出知吉安府作
興士類飭治學宮築堤成梁百廢具興而尤以除
盜去奸為急樂安曾子良聚眾萬餘據險為寇本
深以地逼永豐督千戶王業率兵往禦大破之擒
其渠魁以獻安福有豪民彭搏肆暴於鄉有司莫
能治乃密聞於朝而籍其家九載秩滿吏民相率
奏留上允其請加正三品祿進階正議大夫正統
戊辰以老乞歸初本深涖郡政舉大綱不屑纖小
比巨豪既殲屬邑順理益闊疏法網與民相安每

晨起鼓而出堂閤人報無事輒鼓而退寢間有訟訴呼至榻前折其曲直而遣之亦不受狀在任凡十八年廨前民有舉女者漸見其長已乃及笄笑而言曰襁褓兒已字尚能留此耶去志遂決

方佐

嘉靖寧波府志字用輔鄞人永樂戊子舉人授漳州府檢校陞上海知縣政尚平易不事苛刻

而搜剔奸蠹百廢具舉巨猾宿冗罔不屏迹日詣學官課諸生殿最講解經史士民翕然向風正統改元用少傅楊溥薦陞廣州知府振肅綱紀百度維新以例入覲卒於贛時奉勅守郡者九人鄞人得其三若陳本深為吉安王縈為肇慶及佐為廣州皆古龔黃之流也

俞得儒

兩浙名賢錄字大雅鄞人永樂壬辰進士授監察御史出知賓州賓故多梗化者得儒至

修其政教風俗丕變宣德丙午交趾不庭總戎檄之督餉民弗知勞而兵食足秩滿乞老歸子澤天

順丁丑進士
官四川僉事

顧巽

天啓慈谿縣志字與權永樂壬辰進士授江西按察司僉事公廉仁恕巡歷所至訪察幽隱人

以青天目之遷山東參議恪守清白終始不渝

管思易

嘉靖寧波府志字原理鄞人永樂乙未進士授刑部主事持法平允奉命使湖廣辨疑獄

釋繫囚全活甚衆歸州同知孟紹芳盜庫銀二千許棄官去司府以孟巨璫姻不敢問乃囚其吏郝洪等思易廉知之即上其事徑執孟論誅之而釋洪等已而居內艱起復仍前職時有獄囚王琦罪不應抵尚書吳中以私憾論死思易爭之不聽竟殺之乃憤惋而卒

秦岳

兩浙名賢錄字維翰慈谿人永樂丁酉舉人授兵部武選主事陞郎中調刑部宅心平恕不事

嚴刑而犯者輒得其情正統中陞山西參議督理糧儲時水旱相仍有司催科逾迫而逋積逾多岳曰暑雨艱食民方怨咨急之使倍價以償是轉之溝壑耳況歲且有秋因屬其耆老而諭之民大悅越三月鞭扑不施而積逋咸償以憂去服闋調廣東以疾卒

戴浩

嘉靖寧波府志字彥廣鄞人永樂庚子舉人判東昌管河道九載遷守雷州州故並海適病稼

乃築堤以捍風潮民歌其功改永州又改鞏昌歲飢矯發邊儲三萬七千餘石賑之監司語以法浩曰法固知之如民飢何以一人命活千萬人命固將甘之乃上疏自劾朝廷優詔原焉尋循例致仕居鄉躬行德誼表率宗族置義冢立義塾後其孫鰲鯨鰲相繼舉進士

余麟

兩浙名賢錄字天祥鄞人永樂癸卯舉人授主客司主事陞郎中適河南河溢特授左叅政往

治之至則度水勢築堤防甫期奏功乃詢民間疾苦而恤之察吏治糾墨旌廉六年陞本省左布政使乞歸

王彞

嘉靖寧波府志字友倫鄞人舉賢良任左軍都督府都事宣德中改令仙游先是邑人苦征斂

多通播者彞至撫字有方科差不擾計都里以均坐派條征輸以完積逋民漸復業自解字壇墮以均及倉庫門路悉葺治之民不知有役也三年卒於官邑人建祠祀焉

錢奩

嘉靖寧波府志字文煥鄞人正統丙辰進士授戶科給事陞廣西叅政潯州老藍寇起以單騎

諭平之土官岑豹羅文愈以地訟奩為宣布威德皆帖服焉尋陞左布政時都御史韓雍征大藤峽會歲祲以軍餉為憂奩措置得宜上下充給凡所俘獲必加詳讞得活者甚衆力請致仕子璚字廷

祐弘治己未進士令潛山青陽皆有惠政官至廣西副使

王士華

湖廣通志字彥實鄧人舉進士正統間以工部都水司員外奉勅築華容諸防相度便宜

勸富民出粟建預備倉擇廉慎吏掌管以待工役歷九載計所築圩四十有八堤百五十人呼為王

堤公

姚堂

嘉靖寧波府志字彥容慈谿人正統己未進士授工部主事歷陞廣信知府治行為江西第一

以內艱去服闋起知蘇州府蘇故多羨餘歲以萬計堂悉籍公帑以備賑恤又修孔子廟先賢祠會以事忤巡撫劉政乃移守鎮江治鎮一如蘇政通惠洽流民復業者九千五百餘戶轉廣東叅政卒堂三典名郡皆著名績而尤所注意者興學養士恤孤舉遺棄表名賢以禮化民故所在民懷其惠

王鼎

天啓慈谿縣志字器之正統中舉明經授本縣訓導陞監察御史巡按山西有知縣郭某者貪

而善賂鼎瀕行當道交口舉郭及按縣郭倍道遠迎承奉周至鼎即摘發其貪罷黜之民歡呼動地陞江西按察僉事下車日賊吏聞風解綬以憂去服闋改廣東時流賊剽掠鼎一日出巡為賊所得舁至寨中時有二王僉事一為吳人頗多藏賄賊誤為是將以媒貨有識之者曰此浙江王僉事清官也不可犯遂輿送二十里外拜謝而去賊既平鼎以年老乞歸

吳桓

嘉靖寧波府志字廷用鄞人景泰舉人選汀州府通判嘗攝守事剖決若流庭無滯訟歷陞常

州府同知均徭役導水利平賦稅修橋梁招流亡給種佃田歸者相望宜興山崩暴水墊溺瀕死者衆桓發倉煮糜以食之又捐俸為倡勸富民出粟以賑靖江瀕海風潮蝕田額稅無辦桓躬為核實

以新漲沙田米補馬撫按凡七上章特薦而桓以病乞歸遂進階中憲大夫致仕

陳淳

陳英

嘉靖寧波府志淳字德溫鄞人景泰癸酉舉人知欽州時靈山民有死獄株連

數百人會大暑狴戶皆滿淳止繫當罪者數人餘皆出之守大怒淳引法力爭竟不能屈舊有義倉儲穀二萬餘石積為豪強所侵悉徵理之歲適大祲民賴以活撫按賢之以廉州知府會薦命未下而卒弟英字廷賢成化壬辰進士知廬陵縣疏困均賦戶口繁增會大旱齋沐禱雨輒應陞監察御史以風節著

江勛

兩浙名賢錄字元勛奉化人景泰甲戌進士擢監察御史巡按山東湖廣山東苦饑民多流亡

乃設法賑濟田野安生湖湘旱澇相仍穀價騰湧民不堪命而內臣銜命將啓局造紙勛奏罷之擢

廣西按察使蠻峒弗靖勛謀盡撫
綏斥貪去暴綱紀肅然以內艱歸

盧瑀

嘉靖寧波府志字希玉鄞人成化己丑進士授
刑科給事中疏罷淮揚貢賦十餘萬繙及西北

勒市戰馬宿弊又劾巨瑞田興梁訪等竊柄引用
奸僧繼曉妖術罔上事直聲大振陞工科都給事

以上疏忤旨廷杖逮獄出為長沙府通判陞真定
府同知詰暴撫良能聲藉藉當道上其治狀陞廣

平府知府廣平故牧馬地豪貴家數侵匿而委其
徵於貧戶瑀剗洗奸蠹盡反豪貴家侵地民困大

起又興學勸士日進諸生於庭指
授經義三輔之地蔚然比鄒魯焉

王愷

兩浙名賢錄字宗元定海人成化舉人授平原
令俗多盜有麥商夜經村寺被劫陳於縣愷故

匿其事陰令販豈者和少熟豈其中夜過寺門復
劫去乃令捕兵易服就寺僧貨豈中有熟者遂收

捕不待訊而服自是盜賊屏迹後權要以非法相強愷曰令可去法不可撓遂致仕

章銳

兩浙名賢錄字元進鄞人成化壬辰進士官刑部主事晉郎中剖析滯獄精於老吏出守鳳陽

應詔陳言上鳳陽軍民利病及時政十八事多議行會旱蝗雩禱輒雨復奏捐稅三之二陞湖廣參政錦田苗獐反當事者憚不行銳獨蒙犯瘴癘深入平之竟感疾卒

孫紘

嘉靖寧波府志字文冕鄞人成化戊戌進士授鎮江推官以廉明稱擢南監察御史南都有國

威橫奪民田萬計紘悉稽版籍奪還民太監郭鏞犯後湖私渡禁紘抗章劾罷之已而守備蔣琮冒奪民蘆洲侵後湖墻地為田紘復率諸御史共劾之坐謫廣德州判陞知州專務德教持大體不為煩苛威行豪強而良善者不知有官府尋卒於官

楊文卿

嘉靖寧波府志字質夫鄞人成化戊戌進士授刑部主事逋寇席英王勇白晝殺人邏者

不能得躡賊所過逆旅主人逮繫之有夏廣才者坐窩主論死文卿爭之曰廣才迫於凶暴飲食之耳何窩之有竟出之陞山西提學僉事遷山東提學副使所至頒條約以示勸懲士風振起以疾卒官

李文昭

嘉靖寧波府志字誠之鄞人成化庚子舉人授淮安通判東海有富民殺人屢年不決文

昭一訊即得其情沐陽田數萬頃故有河澮墮高埕庠早潦俱病文昭為疏導陂障民甚賴之遷南寧同知歷陞重慶知府況村土官黃文昌倡亂單車往諭降之以勞瘁卒

楊守隅

鄞縣志字維德成化甲辰進士為兵部車駕司主事出按陝西馬政剗剔宿蠹歷陞江西

左參政時逆瑾弄權有誣人不法事罪應籍沒守隅獨憐其誣瑾怒奪職歸瑾誅詔起原職旬宣四

川適流賊藍老人麻六等剽掠蜀漢間勢甚猖獗守隅多方捍禦四川以寧尋陞廣西布政使致仕

王瑫

嘉靖寧波府志字宗玉鄞人成化辛丑進士除臨邑令值歲洊饑瑫白於監司不待報發粟以

賑吏執不可瑫曰罪在令不在若也卒發之既而以艱去免喪陞江南道御史尋陞長沙知府府有

吉藩羣小橫暴不法前守多被窘辱瑫至輒訊其渠魁白吉藩誅之羣小大戢儀賓史朝忠與藩閹

積不相能而承奉朱泉頗有贏貲一夕暴卒衆聞遂誣史利其貲而毒殺之寃不能白瑫為白之

周津

天啟慈谿縣志字文濟成化甲辰進士擢監察御史巨璫蔣琮欲納交治具蕭寺託同僚致之

及門而覺即策馬返閣老邱濬喉人訐冢宰王恕津劾以妨賢病國舉朝避之擢知九江以瑞州盜

起宜選強明廉幹者治之因徙知瑞州津至啟都御史林俊宜用東漢聽盜相斬除罪法林從之盜果平後官至廣東左布政致仕

沈元

嘉靖寧波府志字德元慈谿人成化甲辰進士知南陵縣值歲大祲元發帑藏勸富民出粟賑

之民賴以安擢御史按治淮揚不瑣屑細務薦賢舉能去奸平獄人服其知大體出為湖廣僉事武昌故多大獄元按閱每至夜分假寐輒興務得其情人目之為一省皋陶

周旋

慈谿縣志字堯敬成化丁未進士除南戶科給事轉北兵科時疆圉多故旋條陳方略咸中時給

宜知州劉遜為宗藩構陷一時言者皆繫獄旋上章申救得釋南旺湖久湮奏請復之出叅廣藩平蘇孟凱之亂子士英正德甲辰進士官工部員外郎亦以政績著聞

金洪

嘉靖寧波府志字惟深鄞人成化丁未進士授靖江知縣以才堪治劇改令吳江吳江豪猾縱

橫賦役繁劇小民疲於奔命洪乃裁抑勢家剗革狡吏歲裁冗費銀米緡錢凡數十萬陞御史出按

山東時青州賊戴崇濟南賊楊敘嘯聚為患久而弗靖洪設法勦平之會逆瑾使人諷以進賂洪不

為理瑾乃矯旨為民

王術

兩浙名賢錄字用仁慈谿人成化丁未進士授嘉定知縣吏事精敏縣故有積荒田千頃賦每

責辦於里胥術招撫流移計口授畝給牛種於是流民復業賦有所出治行考江南第一擢監察御

史劾壽寧侯張鶴齡飲酒不敬權貴震懾奉命查盤兩廣以勞瘁卒於梧州

楊子器

獻徵錄字名父慈谿人成化進士除知崑山縣召補吏部主事轉員外郎中陳邊務數十

事尚書馬文升劉大夏皆重嘆許遷湖廣右參議
分守辰常道會榔桂賊起請改道自效冒暑提兵
討平之轉福建提學副使遷河南右參政時方以
榔桂積勞成疾而東賊渡河天寒甚有勸緩行者
子器乘輿而往即至嵩縣居守賊方走湖廣子器
曰賊避土兵必復向汝州洛陽藩籬備不可缺乃
自嵩馳赴之賊至子器輟食登城晝夜調度城守
益堅賊遂引去尋進右布政使轉左卒寧波府志
子器初令崑山盡毀淫祠撤其材以修學校及倉
廩公館樓櫓又以餘材給太倉鎮海二衛修舉頽
廢於馬鞍山麓創野鶴軒集諸生講學以憂去崑
人即奉以祠之補常熟令直塘錢外郎以資豪里
中悅隣人趙重陽之妻令其夫商於外遂與私又
遣人詐為盜以殺之而以盜聞子器察其詐逮治
殺之時亢旱是夕大雨一邑懽呼陞考功主事倡
五經會或謂曹局清嚴不宜泛交遊謝曰吾不欲

以仕廢學會營孝廟山陵聞中有水石抗疏言之
為証者所搆下獄臺省交章論救得免晉驗封員
外郎以不附逆瑾
出為湖廣參議

呂和

嘉靖寧波府志字克中鄞人弘治己未進士知
臨淮縣百度惟新丁憂歸服闋改建平縣歷

陞山東按察僉事有王尚書弟殺人當道莫敢誰
何和致之辟長清令劉儒內結權貴貪橫靡忌和
痛繩之即証和下詔獄久之始白臨清衛指揮柏
紹縱暴不法巡按屬和治之紹逃至京師匿權瑞
家和卒捕得之竟治其罪遷陝西副使繕漢
中寧羌諸城立南鄭金州諸學民立祠祀之

向錦

慈谿縣志字中美舉進士除東流令以循良薦
擢鳳陽同知值歲饑侍郎王瓊奉命賑荒惟土

著者得食流民多饑死錦白瓊計口給食數萬人
無一譁者瓊特疏薦之遷南禮曹出知廉州安南

黎氏脅居民百餘越屯廉界中欽州以盜聞皆論死錦以土人越界罪止為首餘宜遣還御史疏錦失出罷職

陳璧

嘉靖寧波府志字天瑞鄞人正德丁丑進士知滁州陞刑部員外郎時錢寧壻齊佐魏彬弟英

俱坐死而巨璫奉命清審大獄力欲出之璧直前爭曰佐受廖堂萬金用鎮陝西陷人死無算英姦子婦因而殺死王長隨法不可縱二人竟論死轉江西僉事獎廉斥墨風紀肅然先是布政梁宸坐附逆濠論死巡按承當道意欲寬宸璧曰宸一省長吏乃署偽檄遍移各藩罪有浮此者乎宸不果釋而當道深銜之乃改調四川已又勒免官

陸銓

嘉靖寧波府志字選之鄞人嘉靖癸未進士除刑部主事歷遷福建按察添注副使嘗攝海道

漳故盜藪而利窟也諸射利奸人多以厚貨餌監司闢出為患銓獨嚴立禁網剗剔奸蠹卒不為所餌陞河南參政進廣西按察使時弩灘強賊侯公丁雜處胡藍二姓之間相助為寇或議大舉兵誅之銓曰此堅賊黨而分我兵且逆順難明非計之得也不若計殲渠魁而撫其餘監軍如其言弩灘果平陞廣東右布政以內艱歸

陳文譽

嘉靖寧波府志字德卿慈谿人嘉靖癸未進士授刑部主事歷郎中審錄江西多所平反

大學士楊一清被誣下法司覈治諸司難之文譽厲色曰顧事實不實耳何愛於楊公何畏於內府事竟得理出知鎮江府杜請託輕徭役五年之內百姓晏然以忤當道免歸

周南

慈谿縣志字啓東嘉靖乙酉舉人授常州通判署宜興篆桃花港淤塞南畫地開濬逾月完工

又移魏村閘於桃花港口以時蓄洩奉委督運即條三議上實軍儲至計調漳州立保甲法賑龍溪荒擒海賊張國平等復改楚雄以親老致仕

劉安

寧波府志字汝勉慈谿人嘉靖丙戌進士授主事改御史疏陳補君德以圖治安上閱疏大怒

逮赴錦衣衛拷訊兵科給事中胡堯時救之謫餘千典史累遷長沙同知平寧鄉寇有功擢知鳳陽府治行稱卓旋丁內艱歸子志業嘉靖乙丑進士累官江西副使

袁載

廣東通志字安道慈谿人舉進士歷知肇慶府節用愛民修廢舉墜諸不急之費一切蠲去惟

恐為民病擢山東按察副使備兵臨清有中官入境暴橫不法載廷挫之入訴幾不免賴學士袁燁調護乃解調廣東海南副使引疾歸

王挺

寧波府志字子長象山嘉靖壬辰進士授中書舍人擢兵科給事中改工部員外進郎中時

大工繁興諸省運木先於張家灣出水以次拽入神木廠完者始取批迴動經歲月間有水漲漂木去坐累死亡者挺奏即水次設廠竹木至即入給與批迴公私兩便遂著為例陞江西參議督糧儲行一條鞭法夙弊盡革轉山東副使備兵徐州決碭山水甃沛縣城賑蕭縣饑利澤尤著遷湖廣參政被劾免官

劉廷誥

天啓慈谿縣志字汝欽嘉靖戊戌進士授開封司理雪十年冤獄擢守袁州時分宜市權

僕隸恣甚廷誥收其桀者笞之同年生居要津請官地拓私第廷誥持不可遂喉言者論之調南康晉福建副使歷四川按察使巫山盜五十人故盜從也郡縣深文入之誥察其寃令縛盜自贖盡縱

之往踰月果縛真盜至盡釋之人人羅拜曰劉公
生我轉廣東布政使歲例貢珠驗珠時先私取其

美者廷誥
一無所取

姚梧

慈谿縣志字文揚嘉靖辛丑進士授嘉魚令邑
治濱江多寇警梧簡練士卒盜不敢入又捐俸

築隄外捍江波內便行者民稱姚公隄擢工部郎
監龍江權務會川苗掠州縣勅備兵敘瀘多方輯
禦拔劉顯行間絕諸苗要領
捷聞陞福建少參被劾去

項守禮

寧波府志字進伯奉化人嘉靖甲辰進士授
主事轉員外郎中擢濟南知府案牘紛繁判

無停滯新泰饑發帑賑濟陞山西副使備兵井陘
三關趙地固多剽騎憲府設牙兵名為邏卒而實
潛自為盜守禮廉得其情引戮渠首
邏者股慄邊地以寧以內艱去任

張謙

慈谿縣志字子受嘉靖壬戌進士授刑部主事會術士曹祖告建昌侯張延齡不法事下詔獄

武定侯郭勛又誣延齡反曹郎應勛者以計免謙毅然任勘中貴鮑忠密諭謙善治此獄否則禍且不測謙謝曰刑官治獄有三尺法在利害非所計也乃拷掠延齡迄無反狀獄凡三上三得嚴譴竟不可奪僅坐延齡殺人罪謙杖三十謫揭陽典史歷陞南刑部郎出守大名奏循良第一遷廣西參政討七山羅旁徭賊規畫進兵斬獲殆盡晉按察使致仕

姚孟賢

慈溪縣志字汝德隆慶戊辰進士授貴池令為政不事苛細惟以表揚節義獎厲學校為

先務時海瑞為巡撫廉其治行亟稱之遷潮州郡丞海冠林良竇掠劫州縣為患孟賢設策搗巢擒獲無算當事抑其功尋乞終養歸

朱瑩

鄞縣志字仲明萬曆癸酉舉人授清河令補武陵時播冠作亂師多屯聚境內瑩善為措置民

賴無擾又稅璫煽虐瑩設法駕馭帖然安堵而稅額亦視他邑為減歷陞工部員外郎尋改河南僉

事致仕

高萃

鄞縣志字升伯萬曆甲戌進士官刑曹臨淮侯李宗城封倭事變獨身逃歸帝怒下詔獄大司

馬石星本主封議欲嫁禍於遼之督撫言督撫倡訛言阻封事萃詰宗城曰汝罪當死若實言當生汝宗城因具言倭實不受封狀次日廷鞫宗城以實供遂下星獄及定宗城罪萃以八議上從寬典出知肇慶府興利惠民置田贍士多從惇厚肇人肖像祀之

沈九疇

鄞縣志字箕仲萬曆丁丑進士授刑部主事累遷山東參政會平度饑姦民嘯聚幾變九

疇單騎赴之械治渠魁境
賴以安終江西布政使

林可成

寧波府志字弘志鄞人萬曆庚辰進士授太
康令歲祲賑老弱收少壯者繕城給錢民忘

其饑召為御史值南北洊饑連疏請發臨德二倉
及三關歲課兩院贖銀以賑皆下司農如其請他

疏皆侃侃
著直聲

岑應春

慈谿縣志字繹仁萬曆丙戌進士授工部主
事管山陵木與中貴共事一無假貸省繕錢

無算差臨清磚廠故事陶戶輸運至京給直人苦
賠累應春令給直後始辦料復官給運送之費遷

郎中出為東兗道參議陞副使備兵岢嵐繕修
新障百八十餘里人稱為岑公堡未幾罷歸

葛文炳

寧波府志字星垣鄞人萬曆戊子舉人授江
西南城令宗藩攫民爭利文炳進謁益王徐

陳其弊由是犯者得先啓其罪而面決之民賴以安縣南有烟火山二十七障供民樵牧奸民借王府建塋名路之文炳清界斷歸民立石遵守又建水倉免輸兌之艱時乘小竹輿徧厯阡陌察水利勸農桑創立社學以興弦誦在邑六年陞大理評事以疾歸

錢仲選

慈谿縣志字仁仲萬厯戊子舉人選東平州學正丁艱起補東平令進父老訪利弊正戶

籍以均賦定官解以恤民捐俸建廩輸糧兌軍廩有羨米例歸諸官仲選正色曰此皆民膏血也忍吮之耶令常額外悉罷之後免歸貧甚不以介意

徐時進

鄞縣志字見可萬厯乙未進士授南京工部主事遷郎中出守岳州府時採權使絡繹四

出楚璫尤橫郡縣皆畏不敢抗時進獨不為禮亢顏相對璫亦憚其嚴斂跡他往調荊州免沙市稅

覽龍陂荆人德之丁艱起補惠州擢廣東副使監
惠潮以方略擒盜海惠悉平
天啓改元加大理卿致仕

王猷

慈谿縣志字在吾萬歷戊戌進士知漳浦縣榷
使擬設雲霄鎮為竭澤計猷條析利害以去就

爭於上官議遂寢行取工部主
事歷知惠袁二府皆著清白聲

馮若愚

慈谿縣志字明甫萬歷丁未進士授工部主
事審決江南有黥囚闕通權貴前後使者瞻

顧莫敢決若愚至立論殺之直聲大震歷員外郎
中出知襄陽府先是礦璫四出楚璫陳奉尤驚橫
自開府武昌而以原奏韋國賢充錦衣開府樊城
黨與分布發人塚墓或夜入民舍搜括私藏遇斗
米亦稅之襄民洶洶嘯聚成七寨若愚抵任歎曰
變在頃刻不急為計安用太守為急召教諭徐中

節以計紿國賢出盡縛稅署爪牙而自策單騎掩國賢縛置郡獄諸黨與在他邑者亦一時盡縛自襄至武昌皆譁傳太守神人七寨民亦散歸隴畝奉恚甚飛章上變楚人邀其疏漢濱兩月不得達時稅使月有進章至是兩月無疏神宗疑楚使皆被殺因撤奉回已復詔盡撤各道稅使奉既去銜若愚不置嗾諸璫以事齟齬之坐是久不遷乃投劾歸光宗登極起南光祿少卿遷太僕未幾以病歸

鄔鳴雷

寧波府志字長豫奉化人萬厯甲辰進士授刑部主事後守建昌時益藩諸邸役橫甚鳴

雷以法繩之不少貸郡故有太平橋稅向為狙獍豪右攬侵鳴雷廉得之悉置諸法時有溢額即遞減免商民稱便尤加意造士置田贍學轉湖廣副使有富人恃財殺人獄久不決至則立置諸法遠

近稱快會母
病乞養歸

錢肅樂

寧波府志字希聲鄞人崇禎丁丑進士授太倉知州飲冰茹蘗力崇教化州故多豪強肅

樂痛懲之又以朱白榜列善惡姓名械白榜者皆下予重杖久之杖者日少陞刑部員外郎丁憂歸後卒於閩

國朝

馮侯

廣東名宦冊慈谿人順治己丑進士粵東李成棟叛侯以副使巡視海道會同大帥統師抵粵

平南韶等郡及抵廣州與大帥相度機宜先以一軍取三水從化等縣旋平廣州傳檄各鄉堡禁擄掠未幾偽青陽伯范承恩據城叛侯遣人恫喝之又使人運諸大礮至西關發礮震天地雜以鉦鼓

聲承恩一時不知所
為遂潰廣州復安

胡文學

舊浙江通志字卜言鄞人順治壬辰進士授
真定府推官巨冠高鼎路恒之西山絕頂垂

二十年并代絳晉俱騷動文學請益汛兵嵩意招
撫鼎率衆出降舉卓異第一擢御史出按兩淮鹽
漕報最內陞候補歸里寧波府志文學涖真定日
井陘賊聚衆事敗指稱偽牒株連數百人文學嚴
治其黨舉偽牒盡
焚之人情始安

謝于道

雲南名宦冊字存我鄞人康熙癸丑進士由
部郎任雲南提學僉事既擅藻鑑尤以化導

為先每試召諸生面教之繞座數百人請業請益
于道手批口答頃刻第其高下士習文體一時丕
變

胡亦堂

江西名宦冊慈谿人康熙十六年由舉人知臨川縣時兵燹之後民多流移田荒賦缺亦

堂多方招徠給牛種躬勸相其逋賦請得展限帶徵民以蘇息新學宮修橋梁及社倉義學民多頌之

徐勅

廣東名宦冊鄞人由進士初任陝之三原令政通人和尋以母老告歸丁艱服闋補順德令禁

離派免浮糧絕苞苴清保甲精識獄泣任四年始終勿渝有新會少年詣堂下曰既聘矣婦翁嫌吾

貧不吾室也勅以越境辭少年以頭觸柱血被面勅憐之繫少年若獲盜狀牒新令逮盜黨其翁至

則曰吾壻也恨不與婦故誣我勅曰壻固無良若持五十金同若女來吾為若絕之至則笑曰五十

金壻不貧矣僦舍西郊趣令完聚其他決獄多類此遷御史卒邑人祠祀之

浙江通志卷一百六十八

欽定四庫全書

史部

浙江通志卷一百

六十九
七十

詳校官給事中臣戴璐

檢討臣德生覆勘

總校官編修臣倉聖脉

校對官中書臣吳甸華

謄錄監生臣李克文

欽定四庫全書

浙江通志卷一百六十九

人物三

循吏三

紹興府

漢

孟嘗

後漢書 孟嘗字伯周會稽上虞人少修操行仕郡為戶曹史後策孝廉舉茂才拜徐令州郡表

其能遷合浦太守郡不產穀實而海出珠寶與交趾比境常通商販貿糴糧食先時宰守並多貪穢

珠遂漸徙於交趾郡界於是行旅不通人物無資嘗到官革易前弊求民病利曾未踰歲去珠復還百姓皆反其業商貨流通稱為神明被徵當還吏民攀車請之嘗既不得進乃載鄉民船夜遁去隱處窮澤身自耕傭桓帝時尚書楊喬上書薦嘗清行出俗能幹絕羣竟不見用年七十卒於家

南北朝

孔靖

孔靈符

宋書本傳靖字季恭會稽山陰人察孝廉拜會稽內史到任務存治實敕

止浮華翦罰游惰由是冠盜衰止境內肅清除散騎常侍本州大中正致仕子靈符大明初自侍中為輔國將軍郢州刺史入為丹陽尹山陰縣土境徧狹民多田少靈符表徙無貲之家於餘姚鄞鄮三縣界墾起湖田並成良業靈符慙實有材幹不存華飾每所蒞官政績修理景和中以讒死太宗

即位追贈金
紫光祿大夫

孔琇之

南齊書本傳會稽山陰人舉孝廉除衛軍行參軍員外郎出為烏程令有吏能還遷通直

郎補吳令有小兒年十歲偷刈鄰家稻一束琇之付獄治罪或諫之琇之曰十歲便能為盜長大何所不為縣中皆震肅遷尚書左丞又以職事知名出為臨海太守在任清約罷郡還獻乾薑二十觔世祖歎息除輔國將軍監吳興郡尋卒

虞愿

南齊書本傳字士恭會稽餘姚人元嘉末為國子生明帝立除太常丞尚書祠部郎歷遷晉平

太守郡舊出蚺蛇膽有餉地者愿不忍殺放山中一夜蛇還牀下復送復還故處愿令更送乃不復歸論者以為仁心所致海邊有越王石常隱雲霧相傳云清廉太守乃得見愿往觀視清澈無隱蔽

以母老解職除後
軍將軍遷廷尉卒

唐

羅珣

唐書本傳越州會稽人為廬州刺史民間舍醫藥禱淫祀珣下令止之修學宮政教簡易淮南

節度使杜佑上治狀賜紫金服再遷京兆尹請減
平糴半以常賦充之人賴其利累封襄陽縣男

宋

王絲

范仲淹王絲墓表字敦素會稽人大中祥符八
年進士選大理寺丞奏獄必持寬典全活甚衆

改太常博士通判衢州州未有學絲始建學舍百
楹時金華郡守缺外臺假絲領之衢之父老燕於
境謂婺民曰我州一鑑何奪之為有詣外臺乞還
者舉拜殿中侍御史慶厯中湖南蠻人亂攻劫郡

縣朝廷以絲為安撫至則察訪利病知前之主者
立重賞以誅蠻人一級萬錢士卒貪之往往害樵
人以為功遂下令曰得賊首者必指其鬬地以為
質其可擒者當生致之自是無枉戮者居軍中凡
十月招安三千人遷侍御史充廣南東路轉運按
察使時交趾有變而廣州當交趾之衝無城守備
絲議陶塼為城造大艦十數日習水戰以待其來
彼不復動歲餘以瘴疾求領小郡遷知通州通人
歲苦海潮流亡者衆絲作長隄以捍之復民田業
量其肥瘠奏免五年至十年之租名權三司鹽鐵
判官

卒

齊廓

宋史本傳字公闢會稽人舉進士提點荆湖南
路刑獄潭州鞠繫囚七人為強盜當論死廓訊

得其狀非強付州使劾正乃悉免死平陽縣自馬
氏稅民丁錢歲輸銀三萬八千兩民生子至壯不

敢束髮廓奏蠲除之為江淮西南轉運使時初兼按察同時奉使者競為苛刻邀聲名獨廓奉法如平時人以為長厚積官光祿卿改秘書監卒

唐翊

萬歷山陰縣志字浙師元祐間中第知靈壽縣歲大旱開河渠溉田數千頃傍渠之田不雨而

稔常平吏盜倉粟翊發其奸例得遷秩歎曰置人重辟而已受賞可乎改從自首律後屢典州郡曹

所至有聲

王琰

於越新編字剛夫其先臨川人父榕為諸暨令遂家焉由分寧尉累遷知衡州所至有政績胡

銓嘗薦之曰治經有行亞西漢之名儒惻悃無華實東都之循吏識者以為確論

杜褒

周必大潛光堂記字伯稱世居越之上虞以篤行著紹興末府帥湯岐公史魏公交薦於朝再

命以官嘗尉崇安力變不舉子之俗治獄無一夫之冤遇大利害密裨其長罷行之陰德不可勝計

貝欽世

於越新編字聖美上虞人紹興中進士授西安尉調武康丞居官廉介太守王十朋表薦

之改知江陰浚運河數十
里溉田無算事聞詔增秩

孫應時

寶慶會稽續志字季和餘姚人淳熙乙未進士尉黃巖朱子為常平使者一見即與定交

紹熙壬子邱宝帥蜀辟入制幕興元帥吳挺死即
白制帥定議差統制官權領其軍草奏乞別選帥

材以代吳氏朝廷從之以張詔為興州都統一方
晏然改秩知常熟縣既滿郡將以私憾据撫倉粟

欠三千斛士民感德至相率擔負詣郡願代償不
報竟坐貶秩卒開禧丁卯吳挺之子曦復歸興元

果據軍以叛曦誅吏部侍郎黃度等六人奏應時
見微慮遠能為國家弭患於未形乞甄錄其後得

旨補其子祖
開下州文學

胡搏

萬歷紹興府志字崇禮餘姚人沂之子嘗為兩浙轉運司幹辦官條無名賦請盡蠲之湖常水

旱疾疫乞多責僧牒轉米緣門以賑二子衛衍衛舉進士累官禮部侍郎封餘姚縣開國伯衍知漢

軍陽

唐闕

嘉泰會稽志字進道山陰人舉進士調明州定海主簿累遷司勳員外郎兩浙歲饑詔以闕為

浙東檢察時州縣抑配豪右往往閉糴闕奏儲粟之家宜勿限以價勿計以數則趨利之徒將傾圉競售不待低昂而價自平又民飢不相保小兒遺棄衢路而法三歲以下乃許異姓收育闕請雖及十歲權聽民鞠養以為已子孝宗皆可之於是全活甚衆拜國子司業遷起居舍人卒闕長於春秋

左氏倣遷固史例
著左史傳行於世

俞亨宗

實慶會稽續志字兼善山陰人隆興二年進士知漳州先是州以鹽抑民計口請給督促

其值急於常賦亨宗首罷之又罷溪港津渡之權聽民往來無禁及減去經總制錢額外苛取者歲

罷緡錢合四萬四千秋滿奉祠里居

嘉定初起為大理少卿以年老歸

孫子秀

宋史本傳字元實越州餘姚人紹定五年進士調吳縣主簿有妖人稱水仙太保子秀焚

其廬沈其人於太湖曰實汝水仙之名矣妖遂絕知金壇縣嚴保伍釐經界結義役一切與民休息

惟豪黠者有犯則痛懲不少貸通判慶元府主管浙東鹽事先是諸場鹽百袋附五袋名五釐鹽未

幾提舉官以為正數民困甚子秀奏蠲之遷金部郎以與丞相丁大全議不合去國開慶元年為浙

西提舉常平徙提點刑獄擊貪舉廉風采
凜然犴獄為清度宗即位進太常少卿卒

孫炳炎

萬厯紹興府志字起晦子秀從子以進士為
福州教授厯遷宗正丞權吏部郎出知饒州

按視虧運米二十萬石請得分限補償詔從之
冠出沒二廣為患炳炎不折一矢解散之廣帥劉
應龍舉以自代會以
言罷歸遂不復起

元

王艮

元史本傳字止善諸暨人淮東宣慰司辟為令
史以廉能稱又辟江浙行省掾史會朝廷復立

諸市舶司艮從省官至泉州建言若買舊有之船
以付舶商則費省而工易集且可絕官吏侵欺
克之弊中書省報如艮言凡為船六艘省官錢五
十餘萬緡除兩浙都轉運鹽使司經歷紹興路總

管王克敬以計口食鹽不便言於行省未報而克敬為轉運使集議欲稍損其額以紓民力沮之者以為有成籍不可改良曰民實寡而強賦多民之錢今死徙已衆顧重改民籍而輕棄民命乎於是議歲減紹興食鹽五千六百引遷江浙行省檢校官有詣中書省訴松江富民包隱田土為糧一百七十餘萬石沙蕩為鈔五百餘緡中書移行省遣官驗視良至松江條陳曲折以破其誣事遂寢後以淮東道宣慰副使致仕

明

王珩弘治紹興府志字叔珩會稽人洪武中陳時務十策有裨治道授鹽城知縣至官承兵革之餘悉心蒞政察利弊而興革之逾年政成永樂初徵為刑部主事不就歸

沃野

河南通志蕭山人洪武初知溫縣時民艱於食野令墾闢荒蕪樹藝桑棗百姓歌曰田野闢沃

公力衣食足沃公育比代去民遮道留之

葉砥

萬歷上虞縣志字履道洪武辛亥進士永樂初為考功郎中出知饒州府虛心延訪悉民利病

而興除之郡故有磁窑銅冶而丁調不減他郡砥奏減四分之一民困以甦

高復亨

萬歷山陰縣志字本中洪武中知河間獻縣招集流亡百姓咸歌思之復知諸城諸城故

密地廢學久復亨至始樹學延儒教化大行尋以事免歸

朱仲安

萬歷紹興府志蕭山人洪武庚午舉人授武進縣簿以善政聞進知縣永樂初拜監察御史

史巡按貴州河南居官廉重臨事必存大體仁宗一日顧侍臣曰朱仲安御史中翹楚也宣德初遷

河南按察使入覲課為十三道風紀之最進通議大夫卒於官

劉季簾

獻徵錄名韶以字行餘姚人洪武甲戌進士授行人使雲南四川朝鮮餽一無所受擢

陝西左叅政民有逋賦積歲不能輸有司峻刑督之季簾至慨然曰民困不能輸為之父母忍督責之耶乃下令緩其征民皆感德悉完所逋陝不產硃砂而歲有課額為奏罷之召為刑部侍郎治獄多平反永樂庚寅坐失出人罪左遷工部主事卒

方自新

萬歷紹興府志諸暨人洪武末以孝行舉擢石首令民負逋上官督責旁午自新憫之召

官民諷諭先出俸為倡竟得米萬餘石為民代輸餘九百石儲為義廩自是荒歲有賑陞鄖陽守上津竹山二縣土瘠民貧科徭與壯縣齒自新為奏減租稅之半考績北上至龍江卒鄖陽人哀之如

喪慈父

胡季本

萬厯紹興府志字秉誠餘姚人太學生授建昌府經歷擢知清江改新淦新淦號多事喜

訟季本為之才一年縣庭清肅時出郊問民所疾苦相慰勞如家人父子卒於官

馮本清

獻徵錄號介菴餘姚人以貢授監察御史永樂甲申春勅同錦衣衛刑科官撫蘇松常三

府長洲有宿盜聚至數百人督兵擒之同事者欲槩論大辟本清不可奏誅其首惡餘差為五等皆得不死按賊吏振士風善政尤著擢福建按察司僉事分巡漳泉兼理海道府歲輸番貨百萬而非其產本清請半折鈔以甦民力建寧大水溺者爭附槎木蔽川而下本清乃聯百艘為浮梁截流救之活數千百人會陳時政甚見嘉納宣德初改江西按察僉事卒

鄭弘

弘治紹興府志字仲耀諸暨人永樂初以明經判安慶府改饒州陞南安同知所歷皆有善政

饒民以燒瓷為業故多官府造作之所弘嘗監督其事忽值窯變瓷器皆成異色守者將以上聞弘謂任土作貢不强所無倘因適然而責其常然後將何以應遽毀之民立祠窰所以報德

胡智

弘治紹興府志字宗愚會稽人永樂辛丑進士授監察御史宣德中陞福建按察副使調廣西

龍州與安南思郎州累年交兵智往諭之為定約遂俱罷兵南丹奉議向武等處戍者病於瘴癘智皆為改擇善地築城移戍興安有水陸三十六所官兵司啓閉因剽攘行者為患智改役民夫啟閉以時往來者便之秩滿陞左布政司景泰初致仕

周頤

萬厯會稽縣志字養浩永樂初徙巨室丁壯實京師頤兄當行而母老遂上疏請代許之已而

入太學卒業拜監察御史屢決冤滯遷山東參議有聲齊魯間調江西平大盤劇寇英宗改元遷福

建左布政使建侯官懷安兩縣學開江山浦城道至今便之

甄完

萬歷紹興府志字克修新昌人舉進士授刑部主事高庶人叛逮捕株連無辜完為詳讞全活

甚衆進員外郎出為廣西參議廣西獠蠻雜處多瘴癘戍兵死者相藉完奏易以土人又建議營田

於近地省轉輸之半景泰初轉湖廣參政會廣東盜起湖南大震完督餉弭盜境內賴以安尋進河

南左布政使屬水旱相仍民多流殍完至發倉賑貸奏蠲夏稅民困稍蘇任方岳前後二十年皆有

惠政朝廷遣大臣按行天下考察獨甄完所治不復考

李貴昌

萬歷紹興府志字用光餘姚人永樂初進士知伏羌縣羌故無城多寇貴昌為計度募民

城之改知江寧時駕方北幸衆務旁午貴昌料理
精敏尚書塞義薦為吏部主事扈駕至京卒於官

貝秉彝

獻徵錄名恒以字行上虞人永樂甲申進士
授湖廣邵陽知縣縣僻而俗險前之名能治

者率以嚴秉彝寬馭之而導以禮義其民感化以
憂去服闋改東阿邑當南北要衝過使往還供給
不絕秉彝規措有方事具而民不擾邑西南有濬
春夏水潦近濬之民恒廢耕秉彝相地開渠納諸
大清河渠成得沃壤數千畝旁邑流徙來歸者甚
衆在官雖小物不棄凡營繕所餘廢鐵敗皮朽索
故紙之類悉存之工暇令煮膠鑄杵搗紙絞索貯
之庫會車駕東幸勅使督建席殿所貯悉濟急用
而民不費有薦之者徵命已下縣耆老諸闕乞留
從之九載考績上京時仁宗監國特陞秩俾復任
民聞秉彝復來踴躍迎拜
數十里其得人心如此

呂童

萬曆紹興府志字邦用新昌人永樂中以貢知興化宋范文正公嘗令是邑流風猶存童至益

自砥礪旌異節除宿弊百廢具舉豪吏蘇奎鄧信交通巨璫視令丞若僚佐童盡發其奸奏而磔諸市境內肅然日與民治溝洫修鄉校在任十三年始終若一日部餉東南竣事還縣以瘁卒吏民號慟與文正並祠名宦

徐士宗

豫章書山陰人永樂中知貴溪縣縣圯於水士宗夙夜經畫修治一新累年逋負奏折絹

布田地坍決奏免稅糧歲饑捐俸倡賑民戴其德任滿老穉赴上司乞留加秩通判仍治縣事

謝瑩

萬曆紹興府志字懷玉餘姚人宣德間授福建布政司都事會閩賊鄧茂七作亂脇從漳州民

民畏死欲應之重臣逗遛不敢進乃以土兵委瑩討賊時賊勢猖獗瑩兵寡不敵惟以忠義感激人

心漳人聞瑩來皆喜曰謝都事來吾屬生矣瑩至民擁馬首瑩曰朝廷討賊汝輩良民勿從賊自取勦滅民心始安不數日賊果就擒漳州得免於難後以孫遷貴贈少傅

葉冕

萬歷上虞縣志字拱辰上虞人正統乙丑進士授南刑部主事景泰辛未擢知松江府廉明公

恕民畏愛之歲屢不登冕悉力賑救賴以全活者甚衆郡有澱山湖其半屬崑山界湖隄壞莫修冕視為一體築隄萬餘丈崑山人感愧陞山東參政累遷右副都御史致仕

呂昌

新昌縣志字好隆舉進士授御史累遷江西按察副使中貴葉某鎮守橫甚其僕白晝殺人市

中昌捕得論死會准邸責民子錢甚急昌視其券久入息多者即焚之葉乃謾語激王王怒奏昌侵侮宗室事下御史按問御史素賢昌抗章訟之事乃白再遷陝西按察使值邊備方亟民困供輸昌

累疏便宜十餘事上悉嘉納之陝俗伉壯巨使司千戶貨雄一方怙勢殺人昌至鳴冤者數百人昌按其事有驗即逮繫斃之獄中於是直聲震中外

馮謙

諸暨縣志字履吉正統舉人知沛縣沛當衝津民力罷於迎送謙力為裁節邑有戚畹莊梨木

廠為民大厲皆奏罷之又浚昭陽湖建飛雲橋民賴其庇

徐琦

諸暨縣志字廷振正統舉人授崖州知州崖民多繫戴竹笠子垂髻來見琦諭以服色當從中

國為易方巾直領之製簡率俊秀使趨於學教以婚喪禮俗為之變在崖九年改道州知州政復報仕最致

朱縉

萬歷紹興府志字廷儀餘姚人正統進士拜南臺御史以剛直見推出為常德守至則求民利

害所宜廢置者張弛稱便在
郡六年政平罰清卒於官

沈性

獻徵錄字士彞會稽人景泰辛未進士授監察御史舉劾無所避天順丁丑方岳郡守員缺命

公卿舉賢能任之性得寧國府剗剔蠹弊一以惠利為本鄰境太平府歲倩宣城民夫五百完取白土為常役破產者十九性奏免之歲大侵輒發羨餘減價出糶以利民在寧國八年政為諸郡最

章瑄

萬厯紹興府志字用輝會稽人景泰進士授職方主事出守山海關時中貴魏榮領神鎗使縱

所部京校假冒試習侵關事後府舍人王延倚藉官掖得管押戍卒恣為淫暴瑄並奏寘諸法御馬都監指揮脫人亦有寵於英宗命使朝鮮而無闕符瑄持之不奉詔脫馳奏上震怒械繫闕下言官論救得釋尋遷車駕郎中進遼東行太僕寺少卿諸番貢馬入境多為閫帥所擅瑄請歲遣官聞所

貢馬於各邊自是歲得良馬無算建學以教列校子弟遠士始知禮義尋乞歸

周芳

獻徵錄字廷桂山陰人景泰丙子舉人成化中授豐城知縣豐地大戶繁牒訴輶轡日以千計

芳無所阿避兩造在廷察詞燭理是非立剖案無留牘龍潯洲在遠鄙與鄰境谿洞相構扇為盜芳募民縛其渠魁民賴寧息凡商賈須令給繻為道里憑率入錢於令為堂食費歲可千緡芳捐以緡學及水利所需尋以外艱歸

曹謙

萬厯會稽縣志字廷遜景泰初領鄉薦授潮州同知徙韶州所至以廉能稱遷高州郡守孫瑄

出沒剽掠民不聊生謙綏禦合宜羣夷帖服至有迎拜道左乞田輸稅者高人祠之

王樞

嵎縣志字克慎景泰中以貢授寧國推官剖決明敏獄無冤滯有丁婦鄴少寡其叔挑之鄴欲

聞於官叔懼誘母訟以不孝守將刑之樞廉得其情爭於守曰公不惜一婦人獨不惜寧國郡三年不雨乎守悟鄴獲免以疾卒囊無餘金民爭出錢為賻其子謂不可以喪故污吾父盡却之太守聞而嗟異各捐俸以助始獲歸葬

蕭昱

嘉靖浙江通志字用光山陰人天順壬午舉人授貴溪知縣以簡易為政民用不擾未幾補高

密密地當沙河下湮漫流殺稼昱治塘浚溝取南入水耕法教民濱海為田立均徭九等例撫按頒之一省以為式後卒於官兩邑皆祠祀之

蔣憲

諸暨縣志天順年選貢入京任湖廣應山縣知縣時民未知耕憲為制犂教以耕婦不知紡憲

為制紡車教以織應山民自此饒富

王進

萬歷上虞縣志字蓋臣成化丙戌進士任大理評事轉寺副奉勅恤湖廣刑獄多所平反河間

知府賈鍾納交中貴故殺無辜荊州有獄連戚里者上皆命進往按悉置於法出知成都府歷山西布政使精明簡易以疾卒於官

陸淵

萬歷紹興府志字克深上虞人成化進士授禮部主事尚書陳文卒諡莊敏不協輿論引

司馬先論夏竦事劾之出知敘州府郡故多淫祠悉毀之以祀先賢諭民孝享其先不宜崇惑靡費暇則進諸生講明理道寬徭省訟四境大治

祝瀚

兩浙名賢錄字惟容山陰人成化進士歷刑部郎中擢知南昌府郡當省會繁劇難治瀚廉明

有威聽決無滯時逆濠勢漸熾戕民黷貨瀚屢裁抑之王府有鶴帶牌者縱於道民家大噬之濠牒

府欲抵罪瀚批牒曰鶴雖帶牌犬不識字禽獸相爭何與人事濠卒不能逞後竟以中傷謝事歸

俞振才

俞振英

萬歷紹興府志振才字仲才新昌人成化進士拜御史論列不避權

要巡按四川遷湖廣按察副使先是臬司內有淫祠惑人胥吏以下莫敢近振才至立命撤之弟振

英字仲英以進士知安東一日得淮流浮尸衣夾揚州市繒目振英曰是必有冤遂遣數人分市繒

默察其色記相符者貴買之一人得數縑歸與目無二索其舟果得餘練并所掠少女女言亡官眷

屬被害已十日矣盜二十餘衆皆伏辜歷遷尚寶司卿逆瑾擅權振英至京或謂曰曾謁劉司禮乎

書刺必謙抑振英曰吾老矣不能俛首奄豎遂棄官歸

董復

萬歷紹興府志字德初會稽人成化乙未進士授黟縣令寬徭賦捍水患卹孤乏抑兼并奏最

拜御史孝宗登極首疏斥貴倖數十人直聲大振
以為為用事者所推出知雲南府其治一如在黔

章忱

兩浙名賢錄會稽人成化戊戌進士授臨城知
縣悉心咨訪民所欲惡以次建罷適歲大饑民

多流竄忱為招徠撫綏給種食免征徭民接踵來
歸城北泥河出源泉忱率衆築堤引水灌苗又教
桔槔以濟高阜邑自是有水利修學宮具祭器及
諸壇壝館舍百廢具舉民或以訟至庭忱為開示
曲直告以講信修睦之義民多
自慚惕引退後陞太僕寺丞

韓廉

獻徵錄字守清餘姚人弘治丙辰進士授任縣
知縣任土隘人瘠轉徙者半廉加意拊循省刑

節費民相率歸附徵為廣東道御史正德初按福
建風裁凜然漳南盜肆侵掠督師勦平之時逆瑾
擅權欲以孽孽冒功脅之禍福廉不為動乃矯詔
調高安縣已又摘微過逮繫詔獄瑾誅事白稍遷

潞州知州晉山東
兵備副使致仕

葛浩 葛木

萬歷上虞縣志浩字天宏弘治丙辰進士令五湖考滿召拜南臺御史以論逆

瑾廷杖下獄黜為民瑾敗復官遷廣東左參政新寧盜起時握兵者頗多殺戮獨浩用兵有紀獲盜必多方審驗不妄殺一人後官至南京大理卿子木字仁甫正德丁丑進士歷刑部郎中知淮安府鎮以簡靜加意撫字節冗弛禁富者不苦於役貧者得負鹽以自活淮民戴如慈父遷山西參政卒

官於

陶懌

傳詳
介節

杜民表

兩浙名賢錄字望之嵯人正德丁丑進士知鉛山宸濠之變決策守禦民賴以不擾尋拜

御史大禮議起忤
旨廷杖遂罷歸

周祚

獻徵錄字天保山陰人正德辛巳進士授東阿縣知縣邑號疲劇困於徵輸祚調撫得宜民得

安堵奸猾不敢犯父憂服闋補來安知縣一以治東阿者治之徵拜兵科給事中遷工科左卒紹興府志祚為給事疏陳任將賑饑弭盜均役省兵稽尺籍清廩弊慎祀典飭荒政覆覈首功十數事巡視九邊復陳邊兵芻糧大計悉見嘉納

趙塤

廣東通志字平仲餘姚人嘉靖進士授刑部主事左遷肇慶府同知孤立獨介人不敢干以私

號趙鐵面時征封川麒麟白馬山轉饒數百人部兵者欲掩殺為功塤力止之歷陞廣東參議

周如砥

兩浙名賢錄字允直餘姚人嘉靖巳丑進士知瀏陽改婺源時太宰汪鉉方柄鉉家奴橫

甚如砥一裁以法汪銜之移判武昌汪罷去始遷工部營繕司主事歷郎中時九廟四郊慈慶慈寧諸大工繼起川湖巨材銜尾至故事至則挽入臺基山西二廠聽內豎取裁繕司唯唯而已如砥密召工師索其總冊令挽木者悉以木置長安東西街召諸匠如式裁用然後進兩廠內豎竟一無所得後擢太僕寺少卿請告歸

祁清

紹興府志字子揚山陰人嘉靖丁未進士司李保寧明於讞決陞南禮科給事中疏言軍興費

絀弊有三冗內臣動以千計則官冗監局工匠歲費粟萬餘則食冗諸衛官軍伍缺糧存則兵冗上納其言下部覈覆又劾咸寧侯仇鸞怙寵及藩臬之倖陞卿貳者以是為時所忌出知福州府適海賊內犯民爭入城監司欲阻之清謂民命至重遂入之擢貴州副使苗長楊珂據六洞叛清諭以利

害乃自縛乞降既而王世麒宋廷武王阿利各據險以叛清策於大僚曰世麒兩世漏誅宜發兵進討宋禍起於爭襲阿利負固無能為撫之足矣巡撫如其言卒平衆苗遷湖廣參政增築辰州府城計安銅鼓衛反側議設五溪舟制遷陝西右布政使卒於官貧無以為殮

聞人詮

紹興府志字邦正餘姚人嘉靖丙辰進士為寶應令邑南有泛光湖延袤三百餘里風濤

沒溺軍民病之詮議開越河以衛漕運輿論久不決乃試築一方以一準十工用以衛漕運輿論久不史巡視山海關繕修城堡以大計者四萬餘民不知勞為南京提學御史校刻五經三禮舊唐書行世世宗幸承天後行宮尚存人慮再巡詮為湖廣副使上疏撤之

鄭舜臣

廣西通志上虞人嘉靖丙辰進士授歙縣令歷遷柳州府太守時督撫大征古田調狼兵

十餘萬屯城下舜臣內固城池外安兵衆晝夜不
遑寧處監軍道發俘囚數百名覆審內有幼者六
十餘輩舜臣憫其無知乃各
易年歲而曲生之尋致仕歸

何世學

蕭山縣志字道甫隆慶戊辰進士知丹徒縣
縣當南北之衝漕渠江防百費雜出又更大

水民多逋賦世學節用緩征公私兩裕擢都察院
經歷張居正銜其謹直出為常州貳守遂謝政歸
居鄉力行任卹其建
周陵石隄人尤稱之

張試

蕭山縣志字式言隆慶戊辰進士任休寧令革
里甲行條鞭法改判辰州招撫天柱諸苗開設

縣治陞刑部郎中時神宗久不視朝試上言極諫
語侵貂豎出為撫州守下教墾七里桃花等陂計

萬餘畝
卒於任

鄒學柱

紹興府志字國材餘姚人隆慶戊辰進士授溧陽知縣巨蠹呂祚等夙為民患學柱訪得

之即置之法縣田有官民二則官田賦最重民甚患之學柱力為清丈編以一則官田賦絀則以勢家隱漏賦補之百年大患釐於一日歷知歸德府平白蓮妖擒劇盜朱應科等遷江西副使陞河南左布政使再補山西罷歸

周應中

會稽縣志號寧宇隆慶辛未進士令元氏調繁真定疏濬沱河以通水利教民種稻北方

水田自應中始會以事忤中貴馮保調崇陽均徭役嚴清大勢家病之大計誣列不謹削籍家居二十餘年起補曲周令遷潞安兵備太宰王國光里居不法應中按以律其私人乃力擠之復論調又家居七年起任荆南道荆南臨長江漕舟時覆溺應中酌為幫運支收之法官民便之而為司理所

中傷復論調遂抗疏
乞歸年九十而卒

范可奇

會稽縣志字士穎萬厯甲戌進士以刑曹出守黃州歲額輸絹民以土不蠶率轉貿旁郡

可奇見官解有桑令家人試之與吳越同於是課民種桑笞杖之贖以所種多少為差三年而桑陰蔽野黃之有蠶自此始歲大禋適漕舟至可奇喜曰吾得藉手起此溝中瘠矣故事漕於江者即黃受代以達京師可奇以為此去秋成三月莫若散之民間秋至而收之則滯漕舟不過三月耳力請於大吏報可及期償運之外復得羨米數千石儲以備荒尋陞廣西副使疾卒

諸大倫

西江志號白川餘姚人萬厯八年由兵科給事中謫知東鄉廉能仁愛民苦虛糧賠累大

倫九請丈量田畝既平隱占悉清修
賢舍建義學興廢舉墜民立祠祀之

欽定四庫全書

卷一百六十九

十七

魯錦

紹興府志字文叔山陰人萬歷丁丑進士令山陽時寶應湖頻遭覆溺巡撫潘季馴議開新河

築隄屬董其事計隄千百丈許踰月告竣報最遷刑部主事以忤張居正謫廣德州判官遷定陶令

建義倉立義學設義塚皆實心舉行

在山陽有實政錄在陶有治陶錄

馮應鳳

山陰縣志字鳴陽萬歷庚辰進士為永豐令永豐襟江繞湖田多水患因築隄捍流皆成

沃壤及補御史巡按江右讞諸郡獄必務平反至今刊布為爰書式歷遷太僕寺少卿卒

何繼高

山陰縣志號泰寧萬歷癸未進士居西曹獄多平反時人謠曰執法不阿海與何海謂都

御史瑞也出知衛輝調臨江歲大饑載粟平糶設粥以賑復議免樟樹永平二鎮權稅調知福州倭

入朝鮮聞省大震與撫軍計移築福州城闌人至今賴焉遷長蘆運使立五綱冊核商主默定餘鹽

夾帶例寬徒戍之罪增引額二十二萬增課一十七萬有奇又以羨緡覓滄州城滄人德之遷江西

右參政卒

楊宏科

江西通志字意白餘姚人萬厯進士為新淦令時凶歲浚至宏科散財發粟極力撫循之

盜賊流劫諸鄉捕治其首惡無所株蔓淦賴以安

董子行

福建通志字明卿嵎縣人萬厯間為侯官令吏才精敏奉詔丈田汰浮米無算縣西有石

門峽江水為患子行建議填塞方舉事徵為御史後令周兆聖循其議築之歲獲有秋

史記勲

餘姚縣志字稽叔萬厯癸未進士為南刑部主事累遷重慶知府時楊應龍反記勲主勦

朝方厭兵慮其中梗移守彰德歲歉請折漕米數萬又發贖錢以賑境內得安

戴尚志

府江志蕭山人萬歷中以刑部郎出知瑞州府實政愛民無勾攝之擾無留滯之獄高安

若兌運有責產鬻妻子者尚志與知縣田一甲議為官兌乃令糧簿先期排定船隻民運至舟官押

赴省闕
邑免累

蘇萬傑

舉人授寧海學諭歷遷鎮江同知理王店闕

權悉罷沿途邏卒通河道而稅額自足外艱服闋補邵武攝福寧州故患盜萬傑至獲一賊察其可用釋而撫之使盡疏其黨散置各船給糧為兵遂帖然無他志尋督餉通州轉兵部員外出守大理牒報雲龍州民何天恩等為亂將攻城時議洵洵萬傑持之以靜賊俄潰去擢廣西副使會靖江王叔姪爭立不決擾及官民萬傑以情理折之十餘年懸案立定晉雲南右布政道聞土寇普名

聲結聯交趾反乃疾驅請於督臣移檄交趾慰之以毋得助逆而自單車直詣普壘開布誠信普大悅服後反覆不常乃用間攜其黨魁內自殘殺遂終就撫俄有巨猾張國泰冒歐瑤入滇橫甚院司咸震懾萬傑獨言其偽曰吾恐其飽而颺去耳立邀之至一訊而服人以為神旋為忌者所中拂衣歸

王以寧

會稽縣志字楨甫萬歷戊戌進士知宜興縣時成國魏國等多以賜田為名隱漏正供以

寧履畝清丈力請於上悉為起科以補貧民之稅又立社倉五所捐俸贖為倡儲米萬石陞監察御史按粵東先是粵東兵餉取給於墟鎮場市雜稅市豪墨吏因緣為奸以寧具疏極言其害無名橫征一切報罷尋以母老解官歸

劉永基

紹興府志字止菴山陰人萬厯庚戌進士任
宜興令清吏胥乾沒稅糧執洞庭逋盜聲望

甚著後補贛令邑大饑設六廠貯賑贛民得甦累
陞山西僉事會朝中婦寺交亂恐不免於禍甫挂

冠已即削籍後起
為陝西副使卒

胡一鴻

紹興府志字季漸餘姚人萬厯庚戌進士授
南工曹出知荊州府濱江之田視隄為荒熟

歲久將決一鴻發民修築隄成而利倍補武昌府
水西之亂推擇為辰沅副使以主餉事創運法為

連珠營每營距十里迭為運防輪日番休
黔軍得以藉手轉陝西按察使未任卒

孫如洵

紹興府志號木山餘姚人萬厯癸丑進士授
刑曹出守池州土賊盛長等千餘人沿江肆

掠如洵令鄉民屯聚守隘親率壯士夾擊一鼓而
殲其魁遣山東副使擢濟寧參政賑饑荒以杜盜

源境內以安
後致政歸

姜一洪

授餘姚縣志字開初萬曆丙辰進士授武學教
授累遷河南參政分巡禹州時流賊震動而

河決民不得耕一洪曰不戢之則民將為賊遂開
倉賑之流亡皆返賊犯葉縣鄆陵竟無復為前導
者老回回犯河北一洪往討之多張疑兵而自率
勁卒當中堅賊不敢逼河北獲全歷陞廣東布政
使

倪元珙

紹興府志字賦汝上虞人天啓壬戌進士以
初門令調歙時逆璫私人布中外奸民乘之

歙吳榮以僕計其主吳養春久擅黃山利遣部曹
呂下問乘傳籍其家下問為璫私人隸役恣暴民
一久鼓譟碎館門下問踰垣走民相結聚幾召變
元珙單騎慰諭乃定下問怒無所洩歸獄邑令璫

復遣人馳歛督治甚急元珙據法爭之會逆璫伏誅乃以考最為御史首疏黃山一獄以正諸奸罪出按江西攝理兵事平粵寇督學吳中時有指復社為不軌者朝廷震怒欲創之元珙言諸士修名矜行無亂蹟柄臣以為黨謫光祿寺錄事後遷行人副歸里病卒

國朝

陸元機

廣東名宦冊山陰人順治三年粵初定以元機行廣州知府事開誠布公遐邇向化丁亥

失獄犯陳知希總督佟養甲疑其故縱欲以軍法罪之百姓蜂擁號泣爭乞代死籍其貲止數金遂復其官

謝祖悌

福建名宦冊字友公會稽人順治十三年知建寧府鎮卒張文龍等以缺餉為名擁眾鼓

譟祖悌正色諭之不敢動既而文龍等入據南鄉人情惶駭祖悌密請巡道李元萃約署建協王之綱擒縛倡首正法郡賴以安尋擢湖廣岳州道士庶塞道攀轅不忍其去

董期生

廣東通志山陰人順治十四年由舉人任雷州府理刑雷郡荒糧未豁吏緣為奸期生廉

置之法弊始絕攝廉州篆時橫山一路白晝劫掠道梗不通乃諭地方集鄉丁擒其巨魁橫山始為坦途十七年遷汾州同知歸度梅嶺資斧無措同官共貸之累官淮安太守

姜希轍

紹興府志字二濱餘姚人明崇禎壬午舉人順治初補溫州教授攝縣事以民兵破海寇

陞元城知縣鄰郡饑流民蠅至時逃人令嚴無敢收者希轍悉留之令墾荒地受僱得食全活以萬計卓異擢戶科給事中疏陳侃侃切時政陞奉天府丞乞養歸服闋不起與黃宗義等論文講學四

方之士
皆趨之

余縉

公舉事實字仲紳諸暨人順治壬辰進士授河南封丘知縣時邑甫遭流寇蹂躪之後民多轉

徙縉加意撫恤闢汙萊革耗羨省徭役招流亡民始復業令封六載熟悉兩河形勢遂議引支河以分水勢築遙堤以衛民居均堡夫以防潰溢清灘地以業窮民禁採青以杜騷擾擢御史歷河南山西二道巡視長蘆鹽課嚴禁私販酌通融代銷之法寬老幼負擔之禁商民德之予告歸杜門不出建宗祠捐置祀田學田敦倫睦族任卹好施為邦人矜式康熙甲寅山寇竊發縉散家財募死士為守禦計既而援師至籌餉無出縉首捐金為倡事賴以濟總督李之芳嘉之

何嘉祐

鄉賢留祀冊字子受山陰人順治甲午選拔丁酉副榜知江西奉新縣民多逋賦嘉祐區

畫有方不事鞭朴決歲間宿逋為清民健訟申誠
嚴禁刁風以息擢戶部廣東司主事尋監寶泉局
歷江西司員外郎權闕蕪湖却陋規禁需索陞山
西司郎中以薦改授御史所論列多報可巡鹽河
東力疾冒暑行值鹽池水漲禱於
神一夕水退數尺人謂忠誠所感

馮勸

公舉事實諸暨人順治甲午舉人選桐鄉縣教
諭陞博白縣知縣時兵燹之餘土寇未靖有賴

天錫唐朝奉者侵擾城邑勸守禦擒捕民賴以安
內艱服闋補襄陵縣催科撫字咸得其宜時泰中
饑流民載道勸設廠作粥以濟
全活者甚衆擢山西道御史

余泰來

公舉事實字子閑山陰人康熙壬戌進士授
庶吉士改御史秦晉沔飢流亡載道疏請給

口食勤勸課助牛種則流民不招自至
上嘉納之巡視長蘆鹽課屬吏巨商爭相餽遺盡却之

陞奉天府丞歲饑命發太倉由海運賑濟泰來以民需食甚急捐貲濟運

奉天民俗質樸教以禮讓敦詩書士風丕振

魯超

廣東名宦冊號謙菴會稽人守松江有善政後為惠潮道陞廣西按察司擢廣東布政使前後

在粵凡七載潮舊有絕戶虛丁久為民累超除豁三千餘戶康熙甲戌水漲超晝夜督民築堤至今名魯公堤丁丑歲饑守令議發積貯平糶未敢擅動超力任之未幾果報可洎進粵藩益厲清操葺珠江義學延宿儒以教士粵東兵餉例間用錢適錢滯兵苦虧折強市民物民復苦之超請全給白金兵民均便卒於官

台州府

宋

羅適

赤城新志字正之寧海人治平三年進士為江東令凡民有訟曲直徑決於前不以屬吏黎明

視事入夜猶不已居數月政化大行訟者益少乃出行郊野所過召其耆老問以疾苦及所願欲而不得者為罷行之嘗有書與蘇文忠公論水利凡興復者五十有五溉田六千餘頃歲或乾溢禱羣

祠輒應如響官至提點兩浙京西刑獄

鄭霖

台州府志字景說寧海人紹定進士除南安教授樞密院編修出知贛州後移安慶兼淮浙提

刑權知平江十年之間靖宜興之盜釋久繫之囚撥戶部牙契以給流寓省添差總管以舒邦計修築呂城疏濬練湖公私便益人蒙惠愛後以將作監禮部郎官召不就卒年七十二贈龍圖閣直學

士

杜濬

黃巖縣志字淵卿丞相範之子以司直陞對直言時事出知汀州罷諸邑月解糧數十萬代輸

版戶積逋人以
為不愧家風云

李由

西江志字民載台州人知玉山縣不受請託決訟明果終日坐廳事重門洞開上下之情無不

通者

王甸

黃巖縣志字伯俊居安從子景定中為桂陽判官時邕宜告警桂陽無城州守棄官走匿山中

軍民警擾甸微知守匿所夜半匹馬追及之力挽
守出視事衆乃定已復設立木城修備戎器泣諭
衆曰若寇難巨測吾決當與爾共斃
寇聞有備遂遁人謂其有居安之風

元

周仔肩

臨海縣志字本道延祐五年進士授鄞縣丞遇事立斷剖決如流時徭役繁興仔肩為立

義役以便民轉長興判官剔蠹辨冤卹災賑困百姓威德為立祠祀之

許廣大

成化四明郡志字具瞻天台人登進士第授慶元路昌國州判官再授武義縣尹俱以廉

能聞至正九年調知鄞縣平差役嚴程限有事不遣吏卒惟親署一帖俾相傳遞民無不如約者有訟訴必親折吏莫能售其奸

明

方克勤

宋滌方克勤墓碑字去矜寧海人至正甲辰嘗一踐場屋言國家利害無所顧忌有司不

敢取飄然東歸益閉戶潛心於天文地形禮樂刑政及制度名物之屬必辨析於至當洪武二年詔立郡縣學以訓導辟克勤起應命四年徵上京師特命知濟寧府事至官日引耆耄坐語詢以得失屬縣之內社各立學學凡數百區學子繫籍者二千入兵後號為最盛始有詔民闕廢田者閱三載乃稅吏徵近功不俟期斂之復以田定其科繇民益惰田不增闕克勤與民約定為簡書列丁產為上中下三等復折為三每有徵發恒視書為則吏不敢並緣為姦初赴官時戶僅三萬稅萬餘石三年之後稅以石計者十四萬四千七百戶亦增至六萬有奇二州二十縣家有積粟野無饑孥其為政不喜近名曰近名必立威立威必至害人吾不忍為也府庭間不陳杻械革鞭懸楹間示不妄罰省憲考績為六府最八年秋知曹縣事程貢嘗以不職被笞心銜之上封事言狀誣克勤用倉中

炭葦克勤不與辨遂就逮歿於京師子孝孺

鄭士原

台州府志字孝仁寧海人洪武初陞懷慶同知兵後民著籍僅三萬家士原招來安集平

賦役簡追逮越三年流逋四歸田野墾闢戶稅增十倍河南諸衛軍糧月給鹽十之三各府役車夫赴河東鹽司輦致民困於道路士原牒懷慶等衛俾軍自輦衛挾重臣勢令役民如各府士原持不可曰吾郡民寡而事煩與各府異使月為軍運鹽則父老子弟接踵河東之塗猶不給也其何以為生且設軍以衛民奈何役民以奉驕卒衛不能屈陞湖廣按察司僉事先是荆襄之卒乘亂多掠民女為妻妾或脅為奴部使者畏武臣莫敢究士原至民拜馬前疏訴立召諸衛軍俾還所掠於民士原精練果敢操持勁正吏畏其威而強有力者聞風亦莫敢犯數千里間貪猾屏息會斷刑安陸死

因有稱寃者時獄已上士原索成紫視之語果不
同因上其寃狀御史怒其沮格銜之既而空印事
起遂嗾懷慶吏誣及之士原辯不
勝自誣服輸作江浦卒於京師

於仲完

舊浙江通志黃巖人洪武間任永新縣時南
鄉龍仁和為亂千戶所官幸捕盜為利欲調

軍盡屠南鄉仲完力止之躬率鄉兵執其渠魁
寇平南鄉人戴之若父母生子多以於姓為名

童謨

黃巖縣志字尚弘洪武癸卯領鄉薦授六安學
正擢番禺令歷除山東布政使妖婦唐賽兒亂

謨豫奏請兵不報已而變起有旨逮獄謨竟不自
白及聞皇太子將率兵北伐莫有諫者謨從獄中

齧血草疏以進成祖曰此忠臣也出之調廣西布
政使卒謨自筮仕以來所至皆有惠政山東民至

今頌之

陳公成

寧海縣志字季鏞洪武辛亥進士授耀州同知時兵燹之後草萊蔽野大府責屬州墾闢

荒田商乾華邠諸州虛具頃數以為功公成獨不報曰民生尚窘吾朝夕撫摩之業猶未復又虛增糧額以朘削之是毆之流散也何以為州大府不能強而耀州之民賴以無虛額歷轉廣東鹽課司提舉未任卒

李存仁

黃巖縣志永樂間以賢良薦授沛縣知縣尋更新喻初抵任佯為不諳事體狀逾月閭里

委瑣悉知之一時豪右推抑殆盡境內大治民有慢令者拘其母久之不出既而執其妻即出判曰慢令罪小不孝罪大杖殺之其不煩鞠責而事就理皆此類

許敬軒

天台縣志號南湖永樂甲午鄉貢游國學以才推禮部司務陞儀制司員外宣德庚戌詔

舉近臣優於民牧者敬軒得閩之汀州至則興學校勸農桑開常平以濟貧乏均徭役以鋤強豪以賢良方正薦程原慶朱振等於朝以貪殘虐民劾祝永昇等五人逮治問罪郡內翕然大治

黃敬

廣東通志天台人永樂七年知雷州府先是府多囚繫敬至悉為剖決數月之間囹圄一空府

境被潮漲民多溺死敬設法調之多賴全濟在任數載民安訟息

陳員韜

台州府志字從熙臨海人宣德庚戌進士授江西新城令斥蠹吏核富室詭匿之藉賦役

以平毀淫祠二十餘所奏復廢寺田之據於豪右者七千餘畝以給貧民聽訟明決鄰邑有不平者亦求直焉流民聞風咸復故業先是新城充力士者十餘人例止其身後調守普安主將利為己役勾擾及其子孫員韜奏其事與他郡獲免者六百餘家改知永新奸猾遠遁擢監察御史巡按四川

辨釋諸司死獄四十餘人維州大小姓孫人讐殺
為患員韜諭以禍福皆悅服會福建沙尤盜起特
簡鎮撫其民王師至建寧主將惟日坐城中飲燕
有司乘風徵求甚急員韜至正有司罪狀遂自擁
數十騎直下延平議戰守人心始安後寧陽侯大
舉而下將盡殲之員韜參決其間活脅從者二萬
七千餘家平反疑獄得不死者五十餘人陞廣東
左參政轉右布政使豪僧恃宦者僭民田官不敢
問下車即斷以法會
勦漳寇邁疾不起

侯潤

侯臣

臨海縣志潤字仲璣宣德癸丑進士擢
禮科給事中數對糾駁有聲陞通政司

參議以忤權宦王振落職佐鳳陽尋改知和州嚴
明廉幹民安其化及振敗將柄用適以疾卒從弟
臣字仲勳同榜進士任刑科給事中歷官河
南布政築河隄置水閘中州人立石紀功

高瑛

台州府志字廷璧黃巖人正統戊辰進士除工部主事改南刑部郎中出為四川按察副使兼

巡川西道遇事剖決如流鹽井僻遠吏長肆虐有強悍都指揮者尤不法怨家訐其奸狀無敢問瑛直置之法松茂黥賊劉崇虎叛居鞏利瑛率兵一舉滅之蜀王襲位徧謁郡神欲先大慈寺瑛抗言曰殿下崇儒重道宜先文廟王悅而從之擢本司按察使年五十以母老乞歸

謝省

台州府志字世修太平人景泰甲戌進士授南車駕主事轉武選遷寶慶知府至則條民隱十

四事請於上官次第行之春秋時行郊野賑饑窮教耕織斥淫祠以建社學會計儲積可支五年乃撮朱文公家禮作十勿詩俾民誦習之不率者一裁以法境內肅然會岷府奏欲徙建宮殿事下有司議省執不可已而巡撫力主其議乃乞補教職連乞養病俱不許三載考績至中途告歸

周一清

廣西通志臨海人天順間任慶遠知府政尚嚴明人莫敢欺時瑤賊甚熾乃募壯士協官

軍撫捕之賊漸却當道聞其才檄兼管慶遠衛事以征藤峽功陞正二品

范綱

天台縣志字太和成化壬辰進士授兵部主事擢武選司郎中時武臣皆結交中貴凌次銓選

綱抗顏執法羣奸側目陰中以事出知濱州至則釐奸去弊奏減解部軍糧七十石巡按奏治行第

一秩滿赴京病卒

王弼

台州府志字存敬黃巖人成化乙未進士知漂水縣漂有湖田久棄弼督修舊陂得良疇數千

畝入為刑部郎中有保定人訟戚畹王氏私籍民田奉命往覈即上議歸其田出守興化信號令節夫役表孝義講行鄉射禮以八條約教民民翕然化之漳寇起藩鎮議徵丁壯於莆且脅以軍機弼

曰莆乃寇所自入丁壯去郡誰與守且郡失則萬民死軍機失死止一身耳竟沮其議無何疾卒民

為留衣冠葬之

姜鳳

舊浙江通志字廷儀太平人成化丁酉舉人授舒城教諭陞歸化知縣值歲旱奏減秋米六百

石民頌其德後判臨江築魚梁壩歷遷潼川知州歸

戴豪

台州府志字師文太平人成化戊戌進士拜兵部武庫主事遷員外擢職方郎中會邊報旁午

衆務糾紛豪不動聲色而應答如流時馬文升為尚書特倚重豪諸司奏屬豪看詳同官皆服其精

敏尋陞廣東右叅政

許崇仁

天台縣志字一元成化庚子舉人署河南寶豐教諭陞清流縣尹適潮有屬邑程鄉崇山

巨鑿羣盜嘯聚特設通判一員以才望推崇仁比至簡士卒嚴號令民賴以安江閩寇熾三省出師

會勦崇仁獨當一面躬擐甲胄深入險阻元惡次第授首以冒險得疾遂致政歸

龐泮

獻徵錄字原化天台人成化甲辰進士授工科給事中遷刑科在諫司久扶植善類沮格倖進

每疏入多報可陞河南右布政駕帖取洛陽牡丹疏請罷之司禮太監李榮索古銅鏡器物泮曰物非土產官取之民民無以應則累及塚墓卒不與轉廣西思恩土官有謀為叛者先發以制之具見成績以病歸

蔣顥

台州府志字思誠臨海人成化丁未進士授南刑部主事陞本部員外轉湖廣僉事分巡武昌

吉府儀賓殺人冀以賂免顥立抵以法值鎮守閩張抃為劉瑾腹心有衛指揮張青索軍人財不遂

囚死其父又蘄州衛指揮王欽以貢綠毛龜取部
下二百餘金顯廉實均置之瑾瑾諷當
顯不為徇并大怒密白之瑾瑾諷當
道媒孽罷官瑾敗晉階三級致仕

蔡餘慶

傳詳
介節

楊澤

台州府志字商霖天台人由進士授南刑部主
事陞福建屯田僉事先是建寧等八府歲納屯

糧取道沿海倉民苦覆折之患澤折衷估價兌銀
定為常例尋陞本司副使闕省新建神祠歲遣中

官進香靡費浩繁澤因抗疏其略曰宣尼至聖也
闕里祠祀猶守土之臣主之他亦何煩特使乎朝

議即罷澤為人和內厲歷司邦憲
民無冤獄擢河南按察使未任卒

張成德

仙居縣志名浹以字行成化六年以貢除蜀
南充令邑人好訟有同懷兄弟相許勿休進

而問之曰若等願舉子乎曰然願多舉乎曰然曰
若父之願猶是也今日若於兄弟異日若子於兄
弟亦猶是也二人憮然愧悔後竟以友愛聞嘗創
諭俗亭作戒三篇月朔令父老申諭之又創五經
書院延名宿為子弟師捐俸資其費陞通判
饒州百姓遮道泣送者以萬計無何謝病歸

秦文

獻徵錄字從簡臨海人弘治癸丑進士授行人
正德中遷刑部郎中時逆瑾亂政羅織京朝官

文以身殉法獄精明瑾竟不能害遷貴州提學
副使改陝西兩督學政以抑奔競斥浮薄為先士
習為之丕變遷河南布政司左參政抵任觀河
洛居民彫敝而武宗巡游調度日急遂告病歸

王坊

黃巖縣志字崇賢弘治乙丑進士知霍山縣禮
耆德興學校百廢具舉陞南京都察院經歷霍

民建祠
祀之

蔡潮

分省人物考號霞山臨海人弘治乙丑進士選庶吉士改兵科給事中歷遷貴州右參議時清

平苗寇據香壚山以叛圍城數重潮誓死以守間道轉餉士皆奮勇先登尅日蕞平自鎮遠距省城凡七程重岡複嶺旅行數十里無所依止潮為十里創一亭翼然相望行人賴之轉福建參政督糧儲悉心籌畫軍糈給而兵民不擾山路崎嶇乃相地險隘輒為梁亭如萬里林藍田溪北嶺飛鸞雲嶺一帶悉為康莊轉河南右布政以兩河盜賊充斥令郡縣道周悉種榆柳俾木植成行不惟賊騎難於出沒且蒸薪亦資民用未幾乞休歸睦族恤鄰凡道路津梁圯壞者捐貲修葺如平大惡灘建邵家渡橋移三江埠疏泉井洋凡可以利物濟人者為之無遺力卒年八十三

張儉

台州府志字存禮仙居人正德甲戌進士除工部主事改南刑部員外世宗議大禮儉抗疏爭

且面斥桂萼廷杖者再出為江西僉事豐城水溢親視築堰以禦患民呼張公堰調福建建寧道建寧兩衛屯田半蕪糧蔑由辦照軍攤賠不敷漸派幼丁屯旗不堪命舉子不敢育儉反覆請蠲報可歡聲震里巷陞四川副使會銅梁盜熾儉親援枹鼓勸平之陞福建參政持法廉平有一張八閩安之謠無何致仕歸

侯緘

舊浙江通志字世言臨海人正德庚辰進士授刑曹有中貴下獄為刺請者盈案緘不之視曰

吾知有法耳既而中貴得赦以緘能守法言於上詔賜文綺旌焉歷官貴州布政使時思南宣慰司有讐慢者巡按欲召詰之緘曰彼土官也急之則生變巡按竟召而杖之其部噪至城下發火露刃官司震恐緘曰彼迓其主耳非有他也白巡按出之立階下禮諭而徐遣之卒不為變再遷閩藩卒

於官

汪憲

舊浙江通志字尚鑑黃巖人領鄉薦任新淦教諭陞將樂知縣東豪強立社學庭無私謁獄無

繫囚有流賊將犯境憲披甲身禦之賊畏遁去百姓製銀甲以謝却不受命貯之庫至今名為汪公甲陞寧州知州未至而宸濠變作憲冒險而進贊都御史王守仁平大憝未幾引疾歸

蔡紹科

傳詳介節

潘穎

舊浙江通志字叔愚寧海人嘉靖癸未進士出宰豐城案牘山積一日剖決堂下無稱冤者修

學濬河剔奸釐弊頌聲載道陞南京稽勲司主事兼攝四司黜陟惟允起擢郎中未幾卒

葉良佩

台州府志字敬之太平人嘉靖癸未進士授新城令改貴溪時權璫督造真人府怙勢橫

敏良佩一繩以法率敏蹟不敢肆案牘叢委談笑而立決之廷無留獄擢南京刑部主事有富閭當論死者夜覲二百金良佩拒之竟抵於法再轉為河南司郎中任久法益精諸司有紛訟難解者咸咨良佩而行太平縣志良佩精究典墳以作述名世所著書凡數百卷

應大桂

應存魯

仙居縣志大桂字邦才嘉靖丙戌進士授行人歷除漢陽知府多惠

政改登州清譽益著陞湖廣副使致仕子存魯字得之萬厯己卯舉人除石埭令陞鶴慶通判涖任三載政清訟理不事紛更務與民休息年六十致仕歸

鄭特

舊浙江通志字汝英黃巖人領鄉薦知崇明縣崇居環海中民以魚鹽為計蘆洲為產故事魚

鹽船戶皆有常例動以千緡計蘆洲則聽勢豪兼併特至首除常例而歸蘆洲於編戶勢豪譖之御

史被劾送部調用廷論寃之改調大縣以疾卒喪歸抵姑蘇崇民無老少咸號泣以送

許仁卿

舊浙江通志號古泉臨海人嘉靖戊子舉人任吉安司理彈心獄訟全活最多歷官瑞州

知府救荒殲盜立社建橋陞河南副使致仕

陸州

分省人物考字汝行寧海人嘉靖甲辰進士以刑部郎出守常德先是榮藩嘗請郭西濱江地

租而併稅艫篋之泊埠者久之州廉知非例下令禁治關及經行艫篋商人苦之州廉知非例下令禁治

中官相戒斂跡郡受沅靖五溪諸水舊築土隄捍之春夏水暴土蝕則兩崖之間不辨牛馬州請易

土以石募民貲蠲帑金為長隄百五十步高四仞廣半之滂至始不為災他如均傳費獎士類墜賑

恤每事必為之區畫期於奉法循理尋擢九江兵備副使

王鈴

王洽

黃巖縣志鈴字子才嘉靖丁未進士授
宜興知縣邑巨賦繁鈴至汰冗費闢荒

織緩徵科民咸德之以峭直忤當道調知將樂至
則揭五事以自矢行之一如其言急救化建鄉校
修龜山書院皆有開治體之大者丁外艱服闋補
成安歷陞山東按察僉事引疾歸子洽字近之領
鄉薦授池州司理訊刑聽訟多所昭
雪任池數載凡費用悉資於家云

何寵

台州府志字汝錫臨海人嘉靖癸丑進士知無
為州時有倭警築城浚池而民無擾陞刑部員

外郎中出知潮州潮亦患倭寵一以靜鎮徐察其
利病興革之軍興旁午民不知有徵發忽寢疾闕
郡奔走祈請及卒罷
市巷哭肖像祠之

馮學易

臨海縣志字韋卿隆慶丁卯舉人授河南西
平縣撫字有方人吏和洽陞淮安管河同知

河道自景泰以來歲決歲修迄無成績時議濬趙渠開洳河學易相度効能築隄固岸不遺餘力逮河工告成晉長蘆鹽運同知兩攝使篆洞曉鹺政吏不敢欺尋轉河南運使致仕

蔣承勲

臨海縣志字繼之萬歷丙子舉人授教諭陞東流令首除供具以甦里甲清驛遞侵牟之

弊革兩造先納紙錢陋規凡小大獄務決以情郡俠汪一滄習符咒立能死人利兄貲斃四命而奪之有遺腹孫幸寄他姓獲全寬久未雪來赴愬承勲戒勿泄越日集丁壯托他行倏至滄家備得符詛狀驗實坐辟悉還其貲陞黃州府同知黃郡帆船鱗集駟僧出沒承勲下車清軍役盤獲巨盜招中棄市一境肅然荆府宗藩驕縱凌民巨璫李忠奉旨謁陵虐用民夫悉折以理不為屈治績為三楚冠轉蜀藩長史致政歸

金孚兒

舊浙江通志字吉所太平人萬歷辛卯舉人授曲江知縣值歲侵請於巡撫奏蠲稅糧復

發官帑賑之所活數千家韶郡密通諸洞互市交關者稍忤其意輒羣譁殺掠孚兒內嚴守禦外布恩信徭人戒不犯境為粵東清廉第一

遷

江西瑞州府治中方七閏月告歸

王萬祚

台州府志字君錫臨海人萬歷乙未進士釋褐當塗令甫至先問大姓主名為積害者得

若干人悉法治之諸豪屏息革羨耗嚴保甲政聲大著父憂服闋補汝陽值邑災單車問民疾苦為請緩歲徵民感激急公額賦早足擢南福建道御史彈劾不避權貴奉差下江貪墨吏望風避去所糾皆大僚大奸而纖屑猥細者置不問差甫竣而逝

周頌

台州府志字仲美臨海人萬歷庚戌進士授工部主事陞員外郎中出為武昌太守武昌省會

殷繁宗藩驕恣虐民最稱難治頌至申明禁約裁
折以理咸帖然無敢譁舉卓異擢按察司副使分
巡常鎮道會逆璫魏忠賢遣緹騎逮前都御史高
攀龍高赴水死又逮吏部主事周順昌義民顏佩
韋等公忿業毆緹騎立斃一人吳下鼎沸逆璫矯
旨捕高子世儒頂解坐鼓譟諸生以漏旨株連林
下縉紳鄒嘉生等勢釀不測頌詣兩臺極言冀為
銷輯撫軍毛某難之頌出疏袖中謂如是似當
免咎毛閱之內云方順昌奉旨被逮府縣為促開
讀而官旂不應留連需索訂期十八日致生遠邇
之心此變之所由肇等語因相顧首肯曰如若攀
龍已死其子當亦見原不獨可全活諸紳士於順
昌一案亦易了也遂如其稿以上得旨止置顏佩
韋等五人於法餘一無所問嗣璫偵知其事罷官
歸崇禎改元起補湖廣布政司參政分守荆南道感疾卒

任大治

寧海縣志字天卿萬厯己未進士授無錫知縣歷陞刑部郎中時顧宗孟以觸魏璫下刑

部勘大治即謝病司寇入卧内强起之答曰天日在上詎可附會予頭可斷舌不可轉也越月出知

廬州問民疾苦敦厲士習二州六邑之長咸聞風振飭以病卒於任

王如春

西江志黃巖人天啓進士知餘干縣值洪水泛溢出俸賑濟上請減徵改折復捐贖自龍

津至壩口龍窟築隄數十里民稱王公隄

牟賢

舊浙江通志號拙菴黃巖人崇禎甲戌進士授廣州司李俗頗譁張刑書統於省會滯獄者不

下千人賢疏其案牘以慈佐明旬日囹圄為空龍門民叛逐其長吏賢單騎詣鐵岡三峒為指陳善後計龍民拜服行取吏部文選主事後歸里三十年足不至城府

國朝

葉臣遇

鄉賢留祀冊臨海人以貢生選潛江縣知縣地當荆襄之衝時劇寇盤據西山調各省兵

會勦軍需皆倚辦於潛臣遇朝輓夕輸兵有餘糧而民無重累紀功優敘陞郴州知州始至即請還

粵省引鹽之捺稅嚴前朝濫徵之倉米湖南北之人皆愛戴之尋以母老告歸康熙十三年閩寇犯

境時台郡兵糧單少臣遇盡散家財以佐軍需勵士庶為城守計尋事平目擊台郡兵燹之後流亡

日多逋賦日積詣制府李之芳備陳困弊請勘實題蠲歷年荒稅民得蘇息康熙己未督撫交章舉

博學宏詞以病不赴

浙江通志卷一百六十九